


甲子

奉宣獸史

上海宏文圖書館印行



奉直戰史目次

- 一 奉直再戰之動機
- 二 反直派之一致表示
- 三 吳佩孚之進京及與西報記者之談論
- 四 北京政府之討伐令
- 五 張作霖第二次通電
- 六 奉方軍隊之調查
 - (1) 在奉天省者
 - (2) 在吉林省者
 - (3) 在黑龍江省者
- 七 直方軍隊之調查

(1) 吳佩孚所指揮者

(2) 王承斌所指揮者

(3) 馮玉祥所指揮者

八 雙方兵隊之內容

(甲) 直方軍隊

(乙) 奉方軍隊

九 戰事之前驅

十 兩軍最初之防線及戰略

十一 直軍佔領開魯朝陽

十二 奉飛機謀炸彭壽莘

十三 山海關開始作戰

十四 奉軍佔領建平凌源赤峯

- 十五 劉冀之免職及王懷慶之被刺
- 十六 奉軍攻克九門口佔領山海關
- 十七 馮玉榮戰死九門
- 十八 吳佩孚親赴前線督戰
- 十九 沙河寨石門寨之戰
- 二十 奉軍攻克三道關
- 二十一 角山寺二郎廟之戰
- 二十二 馮胡班師入京請求下令停戰與免吳佩孚各職
- 二十三 奉軍進佔秦皇島昌黎灤州等處
- 二十四 吳佩孚敗走塘沽曹銀退位

奉
直
戰
史
目
次

四


機飛射擊砲射高用軍直



彈炸擲拋機飛軍奉

東北軍爭三勢略圖

例圖
軍事地圖
城區、鐵路、水道、縣界、鄉鎮、聚落等標記



吳佩孚



張作霖



斌 承 王



祥 玉 馮





相 作 張

良 學 張



楊 堯 宇




吳 俊 陞



李 景 林



來福張



慶懷王



珪錫杜





洲 蘭 詩



德 樹 溫

奉直戰史

一 奉直再戰之動機

十一年五月之役奉軍敗績於關內張作霖氏跳而免收拾餘燼益治武備二年以來未嘗一日不以報復爲念特以時機未熟無釁可開故坐以待變迨大選告成曹銀就職東南諸省認爲非法張於此時無所表示報聘之使尚不絕於京瀋之間蓋張與曹氏本係兒女親家而其認爲讎敵者則在赫赫大名之吳佩孚也吳當驟勝之餘排除異己儻以武力統一全國攻川攻粵定湘定閩於是各方爲自衛計而有粵奉浙之三角同盟

江浙戰事將開張屢電曹止之謂勿深信吳氏輕啓戰端而曹卒行吳氏之政策不之答復迨至九月十五日張始向曹致一類似最後通牒之電略云今年天災流行饑民徧野余嘗進言討浙之不可足下亦有力主和平之回答然墨

藩未乾戰令已發同時又進兵奉天扣留山海關列車杜絕交通是果何意哉足下近年爲吳佩孚之傀儡至招民怨武力討伐之不可能徵諸蘇軍之連戰連敗而可明余本擬再行遣使來前徒以列車之交通已斷不克入京因此將由飛機以問足下之起居余今枕戈以待最後之回答云云由是而知東南戰事若不發生則東北戰事亦可以消弭於無形也

一一 反直派之一致表示

不幸九月三日江浙開火東南之局既不能保持平和而反直之轍遂輝映於南北矣

三日杭州盧永祥通電云自中樞失馭強藩專政神奸巨蠹乘間竊發或亂國而稱尊或亂法而亂國叛國者變起倉猝不惟舉民國而根本推翻之衆怒所激大難立平亂國者僭竊名器假共和政府之名行武力專制之實惡貫已盈顯戮尙稽此今日義憤所由徧於國中而吾輩誼難坐視也彼曹鋸者素乏常

識安知治理既不受法律之裁判尤不解民意爲何物祇知武力爲萬能遂成衆惡之皆歸人之無良我何容心顧亂國之罪事跡昭然法所不容義當申討邦人君子幸詳察焉東海就職旣貽非法之誚黃陂繼統亦有任期之爭然曹銀則固後先翊戴而且倚畀甚殷之一人也旣逐東海於前復驅黃陂於後恩怨恣於俄頃進退憑其喜怒威福之擅綱紀之素至是極矣臨城一案舉國引爲奇恥四鄰屢有責言曹銀身任巡使擁有重兵坐視境內伏莽思逞不加預防釀成巨變指爲臨案罪魁誰曰不宜交涉結果卒乃媚外求榮歸罪他人而國際地位路政主權則已備受損失矣夫其毀法如彼誤國若此但令曹銀猶得倖逃法網盤踞近畿已足爲民國無窮之患不謂以數罪俱發之身竟敢作公然賄選之舉醜聲四播國民蒙羞各省攤派之款形諸公牘議員賣票之券副在法庭利誘威迫之下果何所求而不得哉國家人格國會尊嚴亦已橫被蹂躪矣賄選既終乃復欲以布憲欺國民是眞愚不可及而不知人間有羞恥

事也。乃至舉。凡總統國會內閣等一切機關職權之所在。初亦不求甚解。惟既好悉歸掌握。則一一皆足資爲亂國之具。以大張其武力專制之燄。比年勞師川黔。用兵湘桂。寇粵侵閩。謀奉攻浙。幾於日不暇給。即使異已有時削除無如。宇內終難混一。而生命財產之犧牲。地方元氣之摧殘。則已陷於絕地。萬劫不復。此而謂之政府。是何異延狼以入室而認賊作父也。顧國民雖有誓不承認之表示。而一切對外交涉依然爲曹銀一人所把持。乃藉解決懸案之機會。以賣國分肥爲政策。收回德發債票。一案內幕之黑暗權利之損失。雖在受其指揮之閣員議員與夫奉其僞命之疆吏。猶能言之。此外則有若斷送東三省鐵路。有若承認法郎付金。有若攘奪興學庚款等國民一致力爭之事件。皆將悍然行之而不顧。至若嬖幸用事。布滿朝列。弄權肆惡。穢德彰聞。居中狼狽。則閭員疆吏仰其鼻息。縱兵騷擾。則國有警察格殺勿論。縉紳之所不齒。都人爲之寒心。總其罪狀罄竹難數。漏網之鳥終必覆巢。及今不圖噬臍。何及國人處此。

徒爲長期之否認無裨根本之解決積汚不除濁流四溢中國雖大寧有完土文化所遺將無噍類永祥等分屬軍人責在捍國不違保境安民之初衷敢忘撥亂反正之大義迭經諮詢謀靡不僉同爰於本日誓於有衆成立聯軍聲罪致討殲彼元惡罔治脅從其有助桀爲虐恃惡不悛者兵略所關用當剷除爲國鋤奸何與政爭爲民前趨寧計成敗就大局言則舉義已有先覺我爲步其後塵就江浙言則我固志在保安彼方實爲戎首當曹鋗受判之日卽本軍解甲之時特電露佈伏希明察

四日奉天張作霖通電云國人苦兵禍久矣年來川湘桂粵十室九空益以本年旱澇爲災又延亘十餘省之廣哀鴻遍地慘不忍聞此在稍有人心者宜如何悲憫哀矜力謀拯救乃曹吳包藏禍心益張毒燄不特對於被災省分略無矜恤之心且更以兵戈慘禍橫施之於完善之區士紳之呼籲無聞外交之責言不恤是何肺腑言之痛心當風潮發生之初作霖屢向彼方切進忠告之詞

勸其以人民爲重。復書頗以和平爲念。方謂其悔禍出於眞誠。乃墨瀋未乾。兵鋒已及。頃接杭州盧總司令江日通電。戎首之責已有所歸。卽聲討之師不容或緩。夫曹吳稔惡山積。悉數難終。姑舉其鑿鑿大者言之。賄買議員以竊大位。豢養爪牙以禍鄰疆。人民所希望者自治也。則盡力破壞之。全國所企禱者和平也。則一意蹂躪之。甚至自身前以奧債責人而德票則不惜。公然承認外人方面。以興學盼我而庚款則施其攘奪之私。賣國喪權窮兵黷武語其罪狀早爲天下所不容。徒以頻年民困已深。不忍使地方重遭兵燹。偶存投鼠忌器之念。遂益啓其舐糠及米之心。流毒既多。輿情共憤。作霖爲國家計。爲人民計。仗義誓衆。義無可辭。謹率三軍掃除民賊。去全國和平之障礙。挽人民已絕之生機。在同人聯氣投合者。固當深表同情。卽被彼方夙受排擠者。亦可共知覺悟。師行所至。塵市無驚。但期元惡伏誅。絕不株連。旁及天日。在上實鑒斯言。敢布悃忱。伏希公察。

盧張既合作廣州方面。孫文亦有北伐宣言。云去歲曹銀飭法行賄瀆亂選舉。
僭竊名器。自知倒行逆施。爲大義所不容。乃與吳佩孚同惡相濟。以賣國所得。
爲窮兵黷武之用。藉以摧殘正類。消除異己。流毒川閩四海。同恨近復嗾其鷹。
犬。隳突浙江東南。富庶橫罹鋒鏑。似此窮凶極戾。誠邦家之大慘。國民之公仇。
比年以來。分崩離析。之禍烈矣。探其亂本。皆由此等。狐鼠憑藉城社。遂使神州。
鼎沸。生民塚壘。本大元帥夙以討賊戡亂爲職志。十年之秋。視師桂林。十一年。
夏。出師江右。所欲爲國民翦此蠭賊。不圖宵小竊發。師行頓挫。遂不得不從事。
於掃除內孽。綏輯亂餘。今者烽燧雖未靖於東江。大戰之機已發於東南。漸及。
於東北。不能不權其緩急。輕重古人有言。豺狼當道。安問狐狸。故遂尅日移師。
北。指與天下共討曹吳諸賊。此戰醞釀於去歲之秋。而爆發於今日。各方并舉。
無所謂南北之分。祇有順逆之辨。凡賣國殃民多行不義者。悉不期而附於曹。
吳諸賊之下。抱持正義。以澄清天下。自任者亦必不期而趨集於義師旗幟之。

下民國存亡決於此戰其間絕無中立之地亦絕無可以旁觀之人凡各省將帥平時薄物細故悉當棄置集其精力從事破敵露布一到卽當尅期會師凡我全國人民應破除苟安姑息之見激厲勇氣爲國犧牲軍民同心以當大敵務使曹吳諸賊次第伏法盡搖軍閥實現民治十三年來喪亂之局於茲敉平百年治安大計從此開始永奠和平力致富強有厚望焉布告天下咸使聞知三方同趨一致而蟄居天津之段祺瑞氏九日亦發出通電云頃讀盧張兩總司令先後通電痛國事日非生靈塗炭維持拯救用全力以盡職責壯哉言乎善哉言乎年來政治目不忍覩耳不忍聞上林已作污穢之場中樞儼成贓私之肆不知國家人民爲何物禮義廉恥爲何事憑逆取之勢無順守之能僥倖弄政荒淫無度甚且盜國肥己損逾萬萬得纔百千亦忍爲之如德發債票是也擁兵自衛國困民窮官吏日夜奉職室家無以自存軍警風雨戒備一身不獲溫飽夫爲國者不患寡而患不均不均之弊上下交征財源斯竭到期外債

整理無方。墮國際之信用。來四鄰之責言。重以構兵。連年南服。已無完土。雨暘失候。中原殆遍。災祲宜如何修省。與民休息。乃當此凶荒。復令四省攻浙。排除異己。連累無辜。貪一己之尊榮。造彌天之罪孽。倒行至此。豈能倖存。夫剝極必復。易理昭然。伐罪弔民。春秋之義嚮之爲彼。効奔走任馳驅者。迫於威勢。拘於情誼。困於衣食。非不得已也。况其昏庸猾刻。卽心腹股肱之寄藏。弓烹狗亦屬數見。不鮮識時務者。固已內斷於心蓄。遠志者。亦當奮袂而起。海內賢豪。一時袍澤。必能當仁。不讓見義。勇爲著劉琨之先鞭。效范滂之攬轡。出民水火。勿任淪胥。迫切陳詞。不盡百一。

段氏此電係天津專員派送。由上海龍華代發。曾經浙滬聯軍第一軍司令何豐林之聲明。段氏爲北洋前輩。素不滿於曹吳之所爲。觀其一種悲天憫人之意。大有老驥伏櫪志在千里之概也。

三 吳佩孚之進京及與西報記者之談論

無何建國軍集中韶關將圖北伐奉軍進攻熱河朝陽北京政府見東北軍事已緊迫卽電召吳佩孚進京謀抵禦之策吳氏乃於十五日早車過鄭忽忽北上十六日下午八時抵京謁曹氏於四照堂開一府中特別會議籌劃對奉作戰之計劃卽設總司令部於天津而以彭壽莘馮玉祥張福來鄭士琦董政國斬雲鶻胡景翼楊清臣張治公等師旅與奉軍相周旋此蓋吳氏在洛陽時之所預計者也

十八日晨北京英文導報記者柯樂文謁吳氏於行轅詢其數年來所主張且又刻苦經營之武力統一政策現時已否達到採取最後手段以實行之之時期吳氏答稱已確認時期來到先浙江次張作霖再次孫逸仙浙江事件十日之內必可了結但在他人手內之事而完全與他人職權有關係者彼則不甚注意彼並不以爲再須調遣軍隊往援蘇齊張作霖公然反叛北京拆毀山海關附近之鐵道其軍隊且攻擊直軍於朝陽直奉休戰時沿奉直邊境所劃之

防區已爲張氏首先破壞故戰事責任已歸張氏擔負除非滿洲完全投降絕無與張氏和解之餘地也至廣東時局驅逐孫逸仙乃一簡易之事惟亦亟待實行加以驅逐蓋一國之內絕不能有兩總統云

四 北京政府之討伐令

先是九月八日北京政府對於浙江盧氏曾下討伐令云據蘇皖贛巡閱使齊變元四日電呈浙江省叛督盧永祥反抗中央招集亂黨蘇省尤處密邇爲保境安民計不得不設防自衛乃該叛督糾同何豐林擅發逆衆攻擊蘇防竟於三日通電背叛中央四日拂曉在江蘇崑山縣附近地方同時並發先施攻擊希望掩襲不備肆其凶殘蘇省防衛疆土素守和平自應悉力捍禦以期達保安之宗旨又據該巡閱使電稱該叛督等罪大惡極國法不容仰懇獨斷立頒明令討伐以尊法紀等語復據直魯豫巡閱使吳佩孚副使王承斌兩湖巡閱使蕭耀南熱察綏巡閱使王懷慶陸軍檢閱使馮玉祥等先後電請並同前情慨

念頻歲四方多故百業凋殘加以今年天災流行嗷鴻遍野本大總統視事以來耿耿之懷惟冀創痛餘生從茲休養雖各省間有隔閡亦但期感以誠信漸致協和該叛督等逆跡漸彰迭據陳報猶飭前方將領恪守防地毋得輕啓釁端曲示包容冀其悔悟不意公然首先破壞治安違背全國人民愛護和平宗旨本大總統爲戢暴安民起見實萬難聽其譎幻徒苦吾民盧永祥何豐林均着褫奪官勳並免去本兼各職由齊燮元督率部隊相機剿辦江浙兩省素爲文化之藪富庶之區人民心理無不酷愛和平喁望統一脅於暴力無可控訴枉遭災燹尤用痛心所有被逆徒裏脅地方應責成各路將領迅速恢復以期早日收束軍事俾安民業中外人民生命財產並宜一體認真保護毋任絲毫驚擾至浙滬兵隊本無畛域胥屬脅從其有自拔來歸悉予自新之路去逆效順除暴安良綏定之期指日可待佈告諸方咸喻此意此令及吳佩孚進京之次日對於奉天張氏亦有同樣之命令云據直魯豫巡閱使

吳佩孚電呈據報近日奉軍動員五路進兵叛迹已著又據直魯豫巡閱副使王承斌熱河都統米振標朝陽鎮守使龔漢治等先後電稱奉天蓄謀叵測近派各軍節節前進集中錦縣拆毀萬家屯一帶鐵道並侵犯阜新縣境先施攻擊又在朝陽附近金角寺三寶營子等處偷架浮橋約集兩旅之衆向我軍猛烈衝鋒不得不正當抵禦各等情比年國步多艱人心厭亂本大總統受任以來卽以振導和平爲職志前因盧永祥等破壞治安首開兵釁中央爲戢暴安民起見不得已明令討伐原期兵禍早消迅紓民困東三省爲東北屏蔽同屬國家版圖前歲張作霖藉端稱兵旋經戡定邇年以來方冀其徐知悔悟痛改前非乃據陳報各情是其野心未戢復乘東南多事之秋爲擾亂中原之計證以近日所傳通電各方益見破壞大局蓄謀已久實難再事容忍不得不以國家權力强行制止除明令總副司令並派各司令外卽責成各該將領督率所部相機剿辦剋日肅清軍隊經過地方所有中外人民生命財產並著一體妥

爲保護母任驚擾至奉天各軍隊有去逆効順自拔來歸者魯從罔治悉予自新務期邊弭平國基奠定布告有衆咸使聞知此令

五 張作霖第一次通電

張氏於二十一日發第二次通電云國家不幸兵禍頻仍凡有人心皆爲疾首作霖偶緣時會謬領軍符才本凡庸深懷非分勉盡桑梓保安之責絕無私毫權利之心頃以曹吳迭次稱兵毒痛海內視國家爲私產以民命爲犧牲玩視天災摧殘自治義憤所激萬口同聲作霖同屬國民敢忘匹夫之責出師聲討不得不然所有經過情形業於支日通電詳陳計邀明察夫曹氏昔同患難中結姻盟平時信使往還異常款洽本無宿怨寧有私爭惟是共和精神以人民爲主體軍人天職以愛國爲前提曹銀竊位以來籠信僉壬醉心武力政治穢見以拂公評又豈敢徇私親而忘公敵凡茲衷曲諒在國人洞鑒之中至於作亂國勢阽危早已衆叛親離天怒人怨棟樑崩折禍迫須臾作霖固不願挾成

霖。一介軍人未諳政治私人權利久已屏絕於心曾誓明神不忘息壤但期元兇就殄卽救國志願已伸嗣後政治如何進行悉聽海內名賢共同商榷國家大計負責有人卽當率隊出關遙歸防地中央政局概不與聞謹此宣言藉明素志。

六 奉方軍隊之調查

奉張自直奉戰後將三省軍隊改編爲二十六個步兵混成旅五個騎兵旅每個步兵混成旅均有騎兵砲兵工兵輜重各科如一旅以五千人計其數至少亦當在十五萬人以上也現將實數詳情列下。

(1) 在奉天省者

軍 隊	旅 長	駐 在 地
步兵第一旅	閻朝璽	鄭家屯
步兵第二旅	張學良	奉 天

步兵第四旅

張作濤

步兵第五旅

李振聲

步兵第六旅

郭松齡

步兵第七旅

湯玉麟

步兵第十二旅

趙恩臻

步兵第十四旅

楊德生

步兵第十九旅

齊恩銘

步兵第二十三旅

張維嶽

步兵第二十五旅

邢士廉

步兵第一旅

蔡木

騎兵第一旅

穆春

騎兵第三旅

蘇錫麟

興城 錦州 奉天 新民 彰武 鳳凰城

(2) 在吉林省者

軍 隊 旅 長

駐在地

步兵第三旅

張宗昌

綏芬

步兵第八旅

陳玉崑

農安

步兵第九旅

劉香九

吉林

步兵第十旅

于深澂

吉林

步兵第十五旅

丁超

局子街

步兵第十八旅

張煥相

哈爾濱

步兵第二十旅

胡永奎

和龍

步兵第二十一旅

蔡冰鎮

寧古塔

步兵第二十六旅

李桂林

雙城堡

(3) 在黑龍江省者

軍隊

旅長

駐在地

步兵第十一旅

巴英額

黑河

步兵第十五旅

萬福麟

滿洲里

步兵第十七旅

張明九

海拉爾

步兵第二十二旅

石得山

呼倫

騎兵第二旅

張奎武

安達

騎兵第四旅

彭金山

泰來

騎兵第五旅

陳輔陞

海倫

此次作戰計劃共分六軍特名其全軍曰鎮威軍。張作霖自爲鎮威軍總司令。第一軍任喜峰口方面約有一師。一旅司令爲姜登選副司令齊恩銘。姜字超。人中。六直隸冀縣人。明治四十一年日本陸軍士官學校畢業爲奉天新派軍人。前年奉直一役尙爲營長現新授十六旅旅長第二軍。

在朝陽方面約有一師一旅司令李景林副司令張宗昌李字芳辰直隸棗強縣人昔爲許蘭洲部下令任朝陽一帶防務業於十五日與直軍米振標兵交綏佔領朝陽寺大凌河左岸一帶陣地張係山東黃縣人第三軍在山海關一帶約有一師二旅司令爲張學良副司令爲郭松齡張爲作霖之子郭亦雅負時望第四軍任葫蘆島方面防務約有三混成旅司令張作相副司令丁超張字輔臣奉天義縣人昔爲二十七師師長孫烈臣死後升爲吉林保安副司令丁字潔忱現任吉長鎮守使兼第八旅旅長第五軍在熱河方面約兩混成旅司令吳俊陞副司令湯玉麟吳字興權山東歷城人行伍出身前清時隨吳祿貞東來現爲黑龍江保安副司令現年六十三歲湯年亦近六十均係久歷戎行者第六軍約四混旅爲後備軍司令許蘭洲吳光新副之許字芝田直隸南宮縣人外有騎兵兩旅野戰砲三營砲兵三旅同時隨各路大軍出發共計三省出兵約有十萬之衆又有飛行隊三第一隊駐山海關隊長張學良第二隊

駐喜峯口隊長趙玉中第三隊駐葫蘆島隊長袁列坡

七 直方軍隊之調查

直軍對奉出兵約二十萬爲直軍領袖之吳佩孚王承斌馮玉祥三人軍力分配如下

(1) 吳佩孚所指揮者

吳佩孚之第三師

一萬人

吳佩孚之青年軍

一萬二千人

楊清臣之二十四師

一萬人

胡景翼之陝軍

二萬人

靳雲鵬之十四師

一萬人

張治公之陝軍

八千人

田維勤之二十六旅

四千人

齊陳之陝軍第一旅

四千人

曹世英之陝軍第二旅

三千人

陶治堂之二十師

一萬人

陳嘉謨之二十五師

八千人

慙玉昆之三十五師

八千人

孫建業之鄂軍第一旅

四千人

曹士奎之鄂軍補充旅

三千人

馬志敏之一團

一千人

丁香玲之一團

一千人

李治雲之一旅

二千人

馬燦林之一旅

二千人

郭振才之一團

一千人

總計（在川者除外）

（2）王承斌所指揮者

王維城之二十三師

彭壽莘之十五師

曹鎬之二十六師

馮玉榮之十三旅

葛樹屏之十四旅

孫岳之十五旅

曹士傑之十六旅

邵汝康之一旅

總計

（3）馮玉祥所指揮者

十二萬人

一萬人

一萬人

一萬人

五千人

五千人

五千人

五千人

五千人

五萬五千人

馮玉祥之第十一師

一萬二千人

張之江之第七旅

七千人

宋哲元之二十五旅

七千人

總計

二萬六千人

此次洛吳對奉之戰。鬪部署計分前線三軍後援十路十七日午後懷仁堂召集聯席會議後即將各路司命派定對奉討伐令下此令亦遂發表錄如下。

特派吳佩孚爲討伐總司令

王承斌爲討伐副司令兼直省後方籌備總司令

特派彭壽莘爲一軍總司令兼第一路司令

王懷慶爲第二軍總司令

馮玉祥爲第三軍總司令

派王維城爲第一軍副司令兼第二路司令

董政國爲第一軍副司令兼第三路司令

米振標爲第二軍副司令

劉富有爲第二軍前敵總指揮

龔漢治爲第二軍前敵副指揮

張之江爲第三軍第一路司令

李鳴鐘爲第三軍第二路司令

特派張福來爲援軍總司令

派曹鏗爲援軍第一路司令

胡景翼爲援軍第二路司令

張席珍爲援軍第三路司令

曹士英爲副司令

楊清臣爲援軍第四路司令

林起鵬爲副司令

靳雲鶴爲援軍第五路司令

田維勤爲副司令

閻治堂爲援軍第六路司令

張治功爲援軍第七路司令

李治雲爲援軍第八路司令

馬林燦爲副司令

潘鴻鈞爲援軍第九路司令

吳長植爲副司令

譚慶林爲援軍第十路司令

張金標爲副司令

特派杜錫珪爲海軍總司令

派溫樹德爲海軍副司令

特派李濟臣爲豫省後方籌備總司令

熊炳琦爲魯省後方籌備總司令

派劉夢庚爲京兆後方籌備總司令

特派鄭士琦爲直魯海疆防禦總司令

派李炳之爲豫省後方籌備副司令

派遲雲鵬爲直魯海疆防禦總指揮

第一軍擔任山海關方面第二軍擔任朝陽方面第三軍擔任赤峯方面第一軍總司令部初設灤州後移設山海關第二軍總司令部卽設在朝陽第三軍總司令部先設喜峯口北之單泉縣徐向熱邊遷移蓋第一軍之任務爲由山海關向綏中攻擊絕奉軍入關之路且爲直軍開入奉之血道第二軍任務在據朝陽進攻義州及北鎮爲直軍長驅入奉之先聲第三軍任務則有一一爲

據熱河邊境以進，窺錦西及興城之等縣，斷紅中及山海關一帶之奉軍後路。又其一則爲進攻義州奉軍後路也。茲再將前後方各司令所轄軍隊調查列下。

第三師師長吳佩孚

第九師師長董政國

第十一師師長馮玉祥

第十三師師長王懷慶

第十四師師長靳雲鶚

第十五師師長彭壽莘

第二十師師長閻治堂

第二十三師師長王維城

第二十四師師長楊清臣

第二十六師師長曹鍊

第一混成旅旅長潘鴻鈞

第四混成旅旅長張金標

第七混成旅旅長張之江

第二十混成旅旅長吳長植

第八混成旅旅長李鳴鐘

陝軍第一師師長胡景翼

陝軍第二混成旅旅長曹世英

豫北鎮守使李治雲

口北鎮守使譚慶林

熱河幫辦米振標

八 雙方兵隊之內容

以上所舉尙未詳。茲更將雙方各師長以下列其名姓。如次其不可考者。蓋闕如也。

甲 直方軍隊

第三師（洛陽）師長吳佩孚。參謀長李成霖。第五旅長馬汝淞。第九團劉煥臣。第十團陳開第。第六旅長張席珍。第十一團孟廣隆。第十二團郭敬臣。騎兵第三團張琢齋。砲兵第三團樂毓昌。
第九師（北京）師長董政國。參謀長姜寶卿。第十七旅長耿錫齡。第三十三團李源崑。第三十四團楊向林。第十八旅長鴻圖。第三十五團田執中。第三十六團程經邦。騎兵第九團王國珍。砲兵第九團張文元。
第十一師（北京）師長馮玉祥。參謀長石敬亭。第二十一旅劉郁芬。第四十。

一。團孫良臣第四十二團。聞承烈第二十二旅長鹿鍾麟第四十三團韓復榘。

第四十四團過之綱騎兵第十一團張樹聲砲兵第十一團孫連仲。

第十三師（熱河）師長王懷慶參謀長程侍墀第二十五旅長陶經武第四十九團郭桂林第五十團劉汝贊第二十六旅長劉富有第五十一團孫德明。

第五十二團崔維藩騎兵第十三團李得勝礮兵第十三團王黻紳。

第十四師（鄭州）師長靳雲鶚參謀長徐壽椿第二十七旅長陳文釤第五十二團李萬春第五十四團史柏齡第二十八旅長王允忠第五十五團王喬第五十六團楊紹先騎兵第十四團閻仁砲兵第十四團蕭玉書。

第十五師（灤州）師長彭壽莘參謀長李葆麟第二十九旅長郭敬臣第五十七團李景武第五十八團劉錫齡第三十旅長郭之楨第五十九團王銀明。

第六十團宋錫金騎兵第十五團曹孟孟砲兵第十團國錫祺第二十師（潼關）師長閻治堂參謀長李樂賓第三十九旅長王夢弼第七。

十七團陳德勝第七十八團郭連峯第四十旅長孫積孚第七十九團楊家彬
第八十團戴廣勝騎兵第二十團劉渤砲兵第二十團李廷輔
第二十三師（天津）師長王維城參謀長潘召棠第四十五旅長邵汝廉第
八十九團姜學海第九十團曹恩培第四十六旅長孫清山第九十一團趙炳
章第九十二團潘學洲騎兵第二十三團韓桂露砲兵第二十三團孟紀廉
第二十四師（河南）師長楊清臣參謀長周炳昌第四十七旅長□□□第
九十三團張志遠第九十四團孫耀齊第四十八旅長張廣瑞第九十五團劉
煥森第九十六團楊茂亭騎兵第二十四團岳官平騎兵第二十四團安錫嘏
第二十六師（馬廠）師長曹瑛參謀長朱鼎勳第五十一旅長曹永祥第百
一團曹士專第百二團馬望援第五十二旅長曹景桐第百三團穆文田第百
四團張光榮騎兵第二十六團董文蔚砲兵第二十六團趙以寬
陝西暫編第一師（順德）師長胡景翼參謀長林立第一旅長岳維峻第二。

旅長田玉潔
第七混成旅（北京）旅長張之江第一團葛金章第二團劉玉山第三團韓多峯

第八混成旅（北京）旅長李鳴鐘第一團石厭三第二團席液池第三團陳毓耀

第十二混成旅（廊房）旅長葛樹屏第一團馮鴻澤第二團李振東

第十三混成旅（蘆臺）旅長馮玉榮第一團楊周昌第二團□□□

第十四混成旅（涿州）旅長時全勝第一團劉金義第二團陸敬德

第十五混成旅（保定）旅長孫岳第一團徐永昌第二團顧占鰲

第十六混成旅（北京大總統衛隊）旅長曹士傑第一團□□□第一團□

□□

第二十五混成旅（北京）旅長宋哲元第一團佟凌圖第二團門致中第三團

團劉汝明

熱河第一混成旅（熱河）旅長張林此外尚有各省區之軍隊。

乙 奉方軍隊

第二十七師（錦州）師長張學良參謀長魏益三第五旅長于止山第十七團母長祥第二十七團崔鳴山第十九旅長高維嶽第三十團劉偉第四十團朱繼先騎兵第二團黃文煥砲兵第三團孟昭甲

第一師（北鎮）師長李景林參謀長李世藩第二十三旅長李爽塏第十一團胡毓坤第二十三團竇聯芳第二十四團邢士廉第六團張憲第四十七團朱同勳騎兵第九團胡殿甲砲兵第二團馬瑞雲

步兵第一旅（遼源）旅長閻朝鑾第五團袁永朔第十五團陳九芝第四十九團任治平

步兵第二旅（奉天）旅長郭松齡第一團王德印第二團劉維勇第三十九團任治平

團孫慶廷騎兵第十四團武漢卿砲兵第十九團鄒作華

步兵第三旅（西豐）旅長張宗昌第二十八團程國瑞第四十四團許崑第二十五團稽玉璞炸彈總隊長王璉

步兵第六旅（興城）旅長裴春生第四十五團李玉文第五十三團齊雲步兵第六旅（奉天）旅長宋九齡第十八團劉輔廷第二十五團范浦江第四十八團劉振東步兵第五團陳琛

步兵第七旅（鳳凰城）旅長湯玉麟第三十七團傅程九第三十八團張從雲第五十八團董福亭

步兵第十二旅（新民）旅長趙恩臻第四十六團竇倫第五十團隊忠誠第五十九團趙鳴臯

步兵第十四旅（彰武）旅長楊德生第二十一團田寶祥第三十三團徐永和騎兵第二十團董懷清

步兵第十六旅（綏中）旅長齊恩銘第十團孫池昌第二十二團劉連瑞
步兵第二十二旅（北寬城子）旅長蔡平本第八團錢忠山第五十四團丁
喜春騎兵第三團王永清

步兵第二十七旅（奉天）旅長溫贊玉第四十一團欒雲奎第五十七團王
春榮

騎兵第一旅（通遼）旅長穆春第五團于鳳林第二十二團王德棟第二游
擊隊統領程海峯

騎兵第三旅（奉天）旅長蘇錫麟第六團彭根國第十五團蕭國慶騎兵第
一游擊隊（洮南）統領張海鵬

吉林步兵第八旅（長春）旅長丁超第十四團楊登舉第五十六團趙繼恆
騎兵第十三團長□□□

步兵第九旅（依蘭）旅長陳玉崑第二十四團趙振綱第四十二團路永才

騎兵團劉寶賢

步兵第十旅（榆樹）旅長于深澂第十二團宋文俊第三十一團李毓久
步兵第十三旅（局子街）旅長吉興第七團王樹棠第九團朱榕第二十九
團楊金聲

步兵第十八旅（哈爾濱）旅長張煥相第十九團劉介臣第五十一團柯文
連

步兵第二十旅（磬石）旅長楊遇春第十三團任永和騎兵第十八團常堯
臣

步兵第二十一旅（寧）旅長李振聲第四團靳恆藻第二十六團蘇德臣騎
兵第七團李盛唐

步兵第二十六旅（雙城）旅長李桂林第十六團孟文卿第三十六團徐士
臣騎兵第十一團陳銘安

步兵第三十四團（吉林衛隊）團長□□□

第二十九師（齊齊哈爾）師長吳俊陞參謀長王濤第十五旅長萬福麟第三十二團李有田第三十八團靖國輪騎兵第五旅長梁忠甲第八團馬占山

第十團孫俊章第十二劉得權砲兵第一團吳泰來

步兵第十旅（黑河）旅長巴英額第二十團張凱文騎兵第一團吳士傑

步兵第十七旅（海拉爾）旅長張明允步兵第二十二旅（呼倫）旅長石

青山

騎兵第二旅（拜泉）旅長彭金山

騎兵第四旅（安達）旅長李冠英第十九團李相庭第二十團劉□□步兵

第二團（黑龍江衛隊）團長富春

九 戰事之前驅

九月十五日直軍第十五師因聞奉天工人五千名在山海關外約六哩處掘

壕甚忙特派偵察隊前往調查該隊於月夜潛往奉兵見之卽向開槍雙方相擊數分鐘偵察隊旋乃退走是日晚乘特別專車赴錦州決定親自統率奉軍當動身時張氏召集官民各界首腦說明出征之理由並切囑俾無後顧之憂

十 兩軍最初之防線及戰略

直奉兩軍之防線布置極長直軍第一軍在山海關彭壽莘董政國王維城等主之以禦奉軍之張學良齊恩銘裴春生等第二軍在朝陽王懷慶米振標等主之以禦奉軍之李景林郭松齡等第三軍在赤峯馮玉祥張之江李鳴鐘等主之以禦奉軍之闢朝璽蘇錫麟穆春等直軍第一軍司令部設於瀋州第二軍司令部設於朝陽第三軍司令部設於平泉直軍戰略第一軍向綏中進攻絕奉軍入關之路第二軍進攻義州等處直軍將由此入奉第三軍進窺錦西

興城及義州斷綏中關邊奉軍後援而奉軍方面則以姜登選之第一軍專備喜峯口馮玉祥部下第三路軍之來襲李景林之第二軍則襲破王懷慶之第二路軍拔朝陽凌源而迫熱河張學良之第三軍則與山海關彭壽莘之第五軍與許蘭洲之第六軍以大半之騎兵隊衝擊開魯赤峯而進熱河與李景林之第二軍取協同動作此雙方最初之戰略也

十一 奉軍佔領開魯朝陽

奉軍第二軍長李景林實負先鋒隊任務該軍向駐北鎮縣溝幫子一帶自奉出動命令全軍一齊出發向朝陽前進十五日晨奉軍約一旅至義州九官臺門與熱河米振標軍四營相接觸直軍取攻勢奉軍取守勢戰至午刻直軍不支奉軍改守爲攻猛力向前肉搏衝鋒直軍大敗奉軍遂佔有朝陽寺及大凌河左岸

十六日晨直軍二十六旅五一團在大西溝將奉軍擊退直軍向前追擊在八道營北票大阪戰甚烈直軍發砲將奉軍火車連橋皆打壞北票之奉軍乃退。

十九日晨兩軍在北票地方激戰甚烈奉軍李景林全師加入又由關外開到一旅分路進撲直軍奮勇抵禦猛力抗拒卒將奉軍包圍斃五百餘人生擒數十奉軍不支紛紛潰退。

同日午後一時朝陽寺三義棧方面有由熱河開到之直軍一混成旅將奉軍第二軍第四隊包圍猛力攻擊奉軍死力對抗結果直軍負傷四百名戰死二百名向朝陽方面退却其後直軍又以步兵三大隊外加騎兵若干猛力反攻復爲奉軍所擊退奉軍之死傷者五十名。

二十一日直軍譚慶林部開至朝陽向尖山子出哨與奉軍李景林部隊相遇直軍即猛向奉軍進擊奉軍潰退直軍前鋒進據尖山子與四方臺之直軍互

相犄角

二十三日午前六時三十分奉天第二軍佔領朝陽縣城殺直軍五百人俘虜三百人奪獲野戰砲六尊機關槍八架來復槍二千枝其餘軍需品無數直軍向凌源方面潰走據奉方軍事報告云直軍計熱河第十三師一旅及熱河混成旅小巡隊警備隊共八九千人數日內迭受重創餘剩不足二千退守山隘奉軍與之劇戰歷七小時直軍乃潰奉軍追至距朝陽西不足六里之處又奉軍第六軍之穆旅於二十二日申刻佔領開魯獲砲彈四十三箱槍彈二十四箱

十一 奉飛機謀炸彭壽莘

奉軍此次戰略趨重熱河而山海關方面則以重兵扼守俾俟熱河一路得手後兩路呼應夾攻直軍直軍則於山海關取攻勢而於熱河取守勢意俟山海關得手而後會合熱河直軍夾攻奉方山海關直軍前線主力爲第十五師兵

額約五千名。司令彭壽莘設司令部於山海關南門之天泰棧。其本人則宿於車站前門。架設機關槍、野砲及飛行機，射擊砲護衛兵士三十餘人。奉軍飛行機連日偵察，發現彭氏之居處，即以爆彈投下。因是彭氏晝間偕幕僚赴戰線視察，藉以潛伏夜間歸營，以避飛行機之襲擊。計自九月十八日起，山海關殆無日不見有奉天飛機茲為分誌於次。

十八日奉飛機八架來拋炸彈，炸死兵士一名，傷一名。有一彈落於鐵道旅館之旁。

十九日奉飛機兩架，擲炸彈於城堡之內。一幼童一驢被炸死。城堡之外兌換所主人被炸死。理髮舖中一幼童被炸斃。城堡之旁住有一老嫗，幸免於難。二十日奉飛機兩架，炸倒兩樹。一彈落於日本租界，一彈落於某英國路員之游廊。

二十一日奉飛機兩架，又出現。經直軍用礮擊中，機身旋即不見。聞其中一架

因機件損傷落於山海關外約五英里之某地。

二十二日奉飛機未來襲

二十三日奉飛機四架來擲炸彈一十六歲之小孩被炸死仍有多數炸彈擲落於日本租界之內。

二十四日奉飛機四架來擲炸彈炸毀鐵道旅館之前門房室數間微有損壞並有數彈落於橋旁。

二十五日奉飛機兩架來襲尙未聞有損傷。

二十六日奉飛機未來

二十七日晨六時半奉飛機兩架忽由北而來內有一機係英國漢萊配吉式擲下之彈炸地深六尺闊約八尺以重量而論實爲最巨大者迨日出後飛機復由東而來近長城處擲下炸彈該機所發之彈無慮百餘雖多數落在他處然直軍砲手顯能發砲有一定方向因其中數彈與駕機者相離甚近也一機

在車站附近擲放炸彈約歷二小時即回。他機則飛往秦皇島飛回時復擲下數彈。惟有一彈落在離車務總管辦公室數碼之處。該處居民向不知飛機之作用。每次飛機來時車站及救火隊鳴笛告警趨往室內躲避者固然在外。面觀看者仍不少。道路相傳遂有彭壽莘於二十六晨在山海關爲奉天飛機投下炸彈所中受傷過重醫治無效當卽斃命於二十七日夜用粗糙棺木裝送北京改殮藉避外人耳目之謠。某報且加以惋惜之論云：直軍第一路總司令第十師師長彭壽莘爲直派有名善戰之將極爲吳佩孚所賞識。彭有兄名壽華亦以善戰著稱。以使酒負氣淳至。旅長竟爾罷退。壽莘任師長後前年奉直一戰在山海關與奉軍戰死傷八千之衆無異全軍覆沒然以洛吳信習地勢資望又僅次於王承斌故畀以第一路總司令位在馮玉祥王懷慶之。上在待遇不可謂不隆乃奉軍在山海關僅取守勢專用飛機作戰二十六日。

以飛機五架亂擲炸彈不料竟中鐵路飯店而彭恰於該處設司令部遂被炸死彭以驍勇受知洛吳而前次大敗於直軍勝利之後此次又慘死於奉直大戰之前亦可謂命運奇厄者已此訊一出大阪朝日新聞特派員小倉氏特至司令部訪彭壽莘經副官長王慶堂接見告彭總司令行止靡定且舉動影響全軍士氣非常重大此種真實情況不能宣布請原諒云云於是知彭氏固依然存在也

十二 山海關開始作戰

山海關方面奉直前哨線之地點均在關外之東以郊野爲界兩軍距離約六公里自十七日下午起卽有斥堠之小衝突十八日午後五時雙方軍隊均沿京奉鐵路附近之三五里內作戰奉軍爲張學良部之朱軍直軍爲第十五師全部兩軍交綏之後奉軍僅放一排槍並未死傷一人卽行退却直軍奮勇急追致中地雷稍有喪失同時奉軍並以飛機示威

二十一日上午兩軍又相接觸激戰稍烈直軍參加戰鬥者爲十五師十三混旅及十二混成旅之一部奉軍爲張學良之二十七師及第二旅第三旅由二十一日晨六時起開始戰鬥至十一時許直軍以裝甲車架機關砲向奉軍攻擊並有別動隊出九門口抄襲奉軍後路二十二日下午直軍進佔王家莊並向山海關以東節節前進

二十二日夜直軍因萬家屯以北奉軍埋伏地雷電網必須攻破始能前進第一軍司令彭壽莘乃在前線驅使馬牛牲畜猛烈還襲又用乾草煤油燃着驅逐馬牛前進二十三日直軍進展十里

奉方自十九日起連日在榆關昌黎灤縣拋擲炸彈向直方挑釁二十三晨在榆關擲八枚北戴河一枚晚四句鐘又飛來飛機五架偵視一切在昌黎山空擲炸彈三枚車站二枚西關白菜園落一枚後即東飛其飛擲炸彈之原因一則恐嚇軍心二則誘直軍前進其在錦縣綏中軍事佈置計畫至爲周密據直

軍某要人之談話云民國十一年奉軍敗後即慘澹經營錦州綏中一帶視爲將來戰爭上之要路然其內容已全部被直軍偵悉其佈防法凡綏中錦縣以西之民房有關行軍路途者全在各村民房屋內挖成戰溝輸送子彈地道大規模之戰壕內部均裝置電話地雷電網就表面上觀之純係民房毫無破綻此地作戰計畫用誘敵敗退法開火後直軍追擊前進彼則後退利用此軍事秘密地陷奉軍將恃此地以得最後之勝利至直軍方面之戰備則舉全力以對付山海關蓋欲衝破關外奉軍之前線直迫錦州截斷朝陽方面奉軍之後

路而潰亂之也
山海關有天然之險今次兩軍對峙其地誠爲兩軍生死關頭僅就地勢而言似直軍優於奉軍因該地已被直軍佔領大有登高凌下之勢奉軍禁止刈割高粱者卽爲蔽護計也今近深秋高粱將自枯死則奉軍將無可恃故不可不早破榆關以鞏固地步然自交綏以來雙方戰事並不劇烈由於布置均未妥

貼。迨二十九日下午砲聲一震，始入於戰鬥狀態之中。此時直軍之在前線者，除十五師及第九師外，王維城之二十三師及曹謨之二十六師亦已開到奉方，則以主力軍防駐綏中，計第十六、第十四、第二、第六、第三各旅及二十七師之工兵一營、第二旅之砲兵一營、第六旅之砲兵二營，復有爆擊隊並由金家屯飛行場派飛機七架、葫蘆島派水上飛機三架，開赴陣地預備作戰。二十八日晚，奉軍右翼前進，直軍以長城前六百米突之舊俄國砲臺爲中心，右至海岸，左至覺山斜面設置防禦陣地。

二十九日下午，奉軍以大砲猛擊直軍陣地，約數百響，直軍並未還擊。後奉軍砲彈將罄，人亦疲乏，直軍第九師騎兵第十五師機關鎗隊開始迎擊，奉軍進迫甚速，直至三十日始止，雙方各有死傷，勝負未分。

三十日夜間，奉軍忽來抄襲，爲直軍十五師哨兵所見，當即以機關鎗迎擊。奉軍稍有退却，次日拂曉，奉軍佔領距山海關七里之墩臺，一帶山坡，直軍潰退。

死一百七十餘人。

十月一日上午九時兩軍繼續接戰，直軍放大砲六響。奉軍亦集合猛攻，但防守嚴密，終未得勢。直軍死者二十人，傷者五十餘人。駐灤縣各師旅紛紛向山海關開拔，晚十一句鐘，奉軍前進攜機關鎗數架，向直軍猛擊，直軍作散開式，抗拒並乘黑夜暗由旁面襲擊奉軍，旋即後退。

同日奉飛機以炸彈擲擊山海關昌黎間之兵房及運兵火車，直軍死傷頗衆。二日奉軍進攻直軍以砲轟擊數響，奉軍即退，雙方均無死傷。夜間奉軍又暗行抄襲，雙方相擊，勝負未分。後奉軍驟然增多，將戰線延長，連日接戰，地點爲萬家屯以北及登臺黃家場、龍王廟、姚家莊、孟姜女廟等處。

三日十時奉飛機由九門繞飛至車站，拋炸彈三枚，落電報房一枚，滿窗玻璃全碎，電報人員全未受傷，惟工程處工人被炸，一名極重，長工二名腿部前後炸傷。拉夫一名亦由腿部炸入，一片血流甚危，兵士被炸六名，均受重傷，電房。

後落二枚死犬二頭所炸地點穴深三尺站臺東落三枚西落二枚電報房人員全逃王站長命工人挖穴而處以避炸彈

四日黎明直軍步隊向紅牆子之奉軍猛擊奉軍猝不及防退出紅牆子午刻奉方有飛機一架自東北而來直軍用高射砲數尊同時射擊正中飛機左翼登時墜落駕駛員二人一死一傷機身損壞運回秦皇島

先是奉軍最前線爲齊恩銘所部之一旅第一軍長姜登選第三軍長張學良爲慎重計將該旅調入鄰綫而改易二大旅之各一部以備挫直軍之銳氣五日之夜奉方前軍密接進攻命令夤夜出發兩軍交戰約三小時未分勝負另派奉軍一部欲誘直軍出而擊之不期直軍竟迂繞奉軍之後路而出突然襲擊奉軍被其夾攻勢極危險幸後軍前進敏捷拚力猛攻以故奉直兩軍一時均遭夾攻兩方傷亡甚衆激戰兩小時未分勝負

六日拂曉直軍約兩團猛向奉軍攻擊砲隊進迫尤烈初奉軍不知虛實嚴陣

以待並不還擊直至八時始探悉直軍進攻形勢突然進攻此時直軍向奉軍擊射已歷三四小時之久不得結果士氣漸息奉軍突施猛烈之迫擊彈飛如雨直軍頗有傷亡乃漸漸向後退却奉軍知直軍有備亦不敢窮追返還陣地直軍因進攻不利乃取守勢約有一旅之衆在長城西約二千米突之地固守左翼司令部設於舊俄兵營距山海關約一千三百米突右翼司令部設在黃土嶺距山海關約八百米突新築戰壕二道防禦極爲堅固以備與奉軍對抗七日拂曉奉軍派出約一團又二營之衆向直軍猛攻激戰及三小時勢佔優勝乃令左右兩翼同時向前出動直至上午十時前線軍隊已將直軍新築二道戰壕佔領直軍紛紛後退奉軍並不窮追分兵爲二協助左右兩翼向直軍猛擊至十一時許奉軍左翼佔領舊俄兵營姚家山等處右翼亦於同時攻克黃土嶺此後奉軍即分三路向前進攻薄城而戰至夜十時許奉軍遂歷將小河口石門口無名口黃土嶺九門口賀家嶺俄兵營姚家山等處完全佔領即

於是日夜十二時由長城以西進迫城內按是役奉軍已將直軍第一防線佔領矣

十四 奉軍佔領建平凌源赤峯

奉軍攻下朝陽後卽分兩路前進一路直攻建平一路暗襲凌源第二軍軍長李景林由朝陽三十里大青山方面長驅而入直迫使建平二十五日平明直方毅軍約三千人由建平方面潛行東進意在反攻朝陽奉軍得軍探密報卽由中途邀擊酣戰約二小時直軍死五百人以上傷亦如之勢遂不支紛紛向青山逃去及二十六日晚八旬鐘時直軍得援又來猛攻勢欲奪取大凌河左岸奉軍分三路擊之李梯隊與宋團均與酣戰一夜此戰勢極猛烈直軍至死不退直戰至二十七日拂曉直軍已死四百餘名傷千餘名被虜一百五十餘名勢始不支向大青山老虎山一帶退去奉軍奪獲山砲十三尊大鎗千餘枝子彈輜重無算

二十六日開魯直奉兩軍激戰甚烈一晝夜槍聲未停直軍死傷甚衆直軍槍械遜於奉軍人數不多又因無精銳之大砲大敗後馮軍及二十三師先後趕到劃分戰線奮勇接戰。

二十九日晨奉軍第六軍副軍長吳光新梯隊長李爽塏攻克建平直軍死百名傷二百名俘虜五百餘名並獲機關槍數架來復槍數百枝子彈軍需甚夥直軍餘衆潰散三十日上午十時第一旅及第六軍入城出示安民建平攻下之前戰事非常劇烈奉軍雖遭重大抵抗仍繼續進行卒獲勝利凌源方面戰爭亦烈第十三師團長一人爲董政國槍斃以其失守北票朝陽也第二軍攻凌源董政國用空氣政策鼓勵士氣佯謂奉軍已退因有兩旅兵力前進致有葉柏壽之大戰及直軍自葉柏壽敗退後復增援兵在官營子地方抵抗奉軍第二軍旅長邢士廉率所部向前猛攻虜獲十三師五十一團一營長張得勝營附李天增二營營長楊振江營附杜全義一營四連連長劉恩敬

一連排長陳國楨一連司務長馬順義二連司務長於萬成五十二團八連排長李鴻儒兵二百七十餘名野砲二門山砲一門步鎗一百七十餘枝子彈七萬餘粒馬五十餘匹牛七頭大車八輛遂與第二軍副軍長張宗昌進攻凌源直軍在凌源者凡四旅兵力因敗殘之餘一觸卽潰三十日奉軍遂佔領凌源直軍向喜峯口潰退虜獲甚多

張宗昌已攻下凌源卽率一團向茶河方面追擊茶河在凌源縣城西南約五十里適王懷慶所部援軍到彼收拾敗殘在該處與張軍對抗王軍爲十三師全部數倍於奉軍兩不相下故戰事異常劇烈張分一營由側面越直軍之背以兩營由正面猛進新勝之餘士氣百倍直軍不支紛紛潰退有兩團因在包圍中全體繳械投誠奉軍奪得大砲四門機關槍八架步槍子彈輜重無算時

十月三日也

吳光新克建平後亦率騎兵一千餘名向赤峯方面追擊毅軍張統領之殘部

一路連戰皆捷預計直方若不增多援兵二日晚可下赤峯不意行至漠里河方面直軍突增多數援兵猛烈反攻奉軍亦奮勇進擊及捕獲毅軍俘虜始知毅軍王張梁三統領率毅軍外八營右騎五營左步十一營砲一營及附屬砲兵四連約六千餘在此毅軍之火藥庫亦在赤峯非與以大創赤峯殊不易下迺於四日電李軍長就近派兵夾擊五日李景林簡拔某旅精銳約一團猛向直軍攻擊嗣復分疑兵一隊向西北馳下又派生力軍一隊潛繞直軍右翼進襲直方毅軍之戰鬥力本極有限相持不及二小時卽已紛紛向後路退却後路軍隊見奉軍北下不知其爲疑兵以爲繞道襲取直軍之後路乃分軍隊爲二迎擊奉軍意欲由兩軍包圍彼此夾攻不謂此項疑兵北向廻行一週後仍自潛回原地而直軍不知仍向前急進從事追擊至隊尾越過奉軍戰線後奉軍遽以迫擊砲隊一團出其不意向直軍後隊突加猛烈之攻擊砲彈紛紛落於直軍中連見死傷直軍不知砲彈之所自來無所措手乃紛紛向四方潰退

此時另有奉軍一隊驀然接應追擊奮勇追至漠里河與另一部直軍相遇激戰兩小時之久直軍仍不支向四方逃散此時奉方在先派遣之一部生力軍因直軍四散乃長趨進攻赤峰同時第二第六兩軍亦皆出動進攻赤峰追約二小時之久兵力漸疲擬略事休息然後前進不期由赤峰左方突來直軍約一千五百餘名騎步參半遽向奉軍衝擊因奉軍事前未嘗防備幾被衝破在此危急之時適有許蘭洲所部騎兵兩營趕到從直軍左側猛施攻擊激戰約半小時之久未分勝負而後路接應軍隊相繼開到加入攻擊奉軍既衆乃分兵三路向直軍圍擊此時已屆晚八時直軍轉戰半日兵力漸疲而援軍不至遂不能支相繼向赤峯退却奉軍追擊二十餘里亦有惰容乃按兵休息至七日拂曉突有直軍一部約二千餘人係王承斌所部猛向奉軍攻擊激戰約一小時之久未分勝負雙方死亡甚衆當兩軍正在力戰之時突有炸彈隊四架入戰線復激戰約一小時之久此時又由奉軍中駛出飛機兩架向直軍中營

駛去。直軍乃向後退却。奉軍乘勢追擊。距赤峯約三里許。復有直軍一大隊接戰。約一千五百餘人。兩軍肉薄。約二小時。不分勝負。此時奉軍飛機已駛入赤峯。擲下炸彈數枚。軍隊商民均皆驚恐。紛紛向外避難。直軍覩此情形。以爲事也是役。奉軍計俘虜毅軍王姓統領一名。營長二名。斃統領一名。其他軍長二十餘名。兵士千餘名。直軍見赤峯已失。乃紛向圍場一帶逃竄。奉軍既克赤峯。熱河重要之地。已十得八九。而直方軍隊二十六旅。劉富有旅。已全散熱河第一旅。熱河方面之毅軍。龔治漢之先鋒隊。外八營等。皆已潰不成軍。在凌源敗退之董政國一旅。亦已損失過半。而後援之軍。大都尙在半途。故熱河方面之戰至此可算告一結束。蓋熱河爲直奉間之要區。直據熱河。可直接入攻東省腹地。其勢至順。奉據熱河。亦可直窺北京。而在運輸上。則奉方有錦朝鐵路。較爲便利。直方則必須駝馬負載。且熱河多山。飲水甚難。得鑿井。

數。仍。而。不。及。泉。致。兵。士。載。冰。塊。以。行。而。東。省。騎。隊。亦。非。直。方。所。能。幾。及。此。勝。敗。
之。所。以。顯。然。判。也。

十五 劉龔之免職及王懷慶之被刺

直方第二第三兩軍之轄地在熱河境內此處原來駐守者爲米振標劉富有
龔漢治等王懷慶所統之第二師卽轄上述之三人而益以十三師在京之一
部其防地原爲朝陽阜新第三軍原定守開魯出綏東前者在熱區之南後者
在熱區之北而平泉承德皆爲腹地不在前線自奉軍佔領朝陽凌源等地形
勢驟然變化重要地點北爲赤峯南爲平泉而承德爲居中策應之所在故防
線特注意於此三處而二三兩軍向之分而爲二者亦將併合爲一策源承德
北則援赤峯以進規開魯南則守平泉以進規凌源俟凌源恢復始能談及朝
陽但王懷慶尙逗留在叨爾登馮玉祥之張之江旅雖已向赤峯進發而已猶
徘徊於古北之口於是二三軍中立之說喧騰于中外之報紙矣

北京忽於四日晚十二時發表命令四道將第二軍前敵總指揮劉富有副指揮龔漢治免去本兼各職而以陶經武張林繼之京中人士頗爲驚訝蓋劉龔均在朝陽前線當此戰事開始之際忽然更換前敵總副指揮顯然有重大之失責處也據外人所言奉軍進攻朝陽時龔漢治所部僅與李景林軍隊開火兩次卽將朝陽失守及十三師二十六旅劉富有所部趕到奉軍來勢正銳未有若何抵抗劉部亦卽紛紛潰退又將凌源失陷退守距凌源六十里之某處龔劉自知事情重大先後電京請加處分吳佩孚時以援軍尙未趕至前線未便表示及二軍已在平泉集中遂卽電責劉龔帶罪立功此電去未二日建平毅軍又有降奉說吳佩孚大怒認爲熱河軍官已處嫌疑地位決將熱河軍務幫辦與朝陽鎮守使兩職暫爲取銷以第二十五旅旅長陶經武繼劉職以熱河第一混成旅旅長張林繼龔職二十六旅旅長則以團長崔維藩遞升此種辦法所以徹效尤并聞在此項命令發表時劉龔二人已有在承德被看管說

信否不可知。然劉龜之免職，確爲失地之罰。據當局所得報告，朝陽之失，在二十三日。劉富有則二十一始至朝陽，二十二晚即行退却，而沿途自葉柏壽廟至三家村一帶，則頗多騷擾。退保凌源，亦於一星期以後不能維持。卽龜漢治亦原守朝陽者，故決然加以罷免也。

同時復有王懷慶被刺之說。云此次王氏本不願親臨前敵，祇以朝陽失守，經吳佩孚之督促，不得不卽日出京。其所部之十三師，久駐京畿，不諳戰術，且下級軍官在奉軍前此駐京時，多互有往來。此次王氏雖到瀋陽，多日而徘徊不進，奉方得此機會，遂大施聯絡運動，某團以要求發餉爲名，忽起譁變，直衝王之司令部。王猝不及防，倉皇出走，爲某叛兵刺刀戳傷左臂，迨衛隊趕至，將凶手擊斃，并將叛兵擊散。王由其親信衛隊扶送至京，入協和醫院醫治。此事直方加以否認，但又傳二日，命陝西第一師長胡景翼爲第二軍總司令，是益使人惑不解也。

十六 奉軍攻克九門口佔領山海關

八。九。二。日。九。門。口。山。海。關。兩。處。要。隘。相。繼。爲。奉。軍。攻。克。此。次。戰。爭。異。常。猛。烈。據。奉。天。受。傷。某。軍。官。言。在。先。各。路。軍。長。因。直。軍。精。銳。彙。集。於。此。兵。力。極。爲。深。厚。於。開。始。接。戰。時。亦。極。慎。重。深。恐。頭。仗。失。利。沮。喪。銳。氣。官。兵。枕。戈。待。旦。者。越。三。日。之。久。尙。不。肯。下。攻。擊。命。令。而。此。時。李。景。林。所。統。之。第。二。軍。戰。勝。捷。電。紛。來。不。絕。犒。賞。之。費。日。有。頒。發。一。三。軍。兵。士。聞。之。均。皆。憤。激。奮。呼。爭。向。總。司。令。部。要。求。即。刻。下。攻。擊。命。令。謂。大。帥。平。時。豢。養。我。輩。原。爲。臨。陣。效。死。之。用。今。大。敵。當。前。按。兵。不。發。不。惟。有。怠。士。氣。亦。且。負。我。大。帥。平。時。養。士。之。心。苟。不。即。刻。下。令。我。輩。將。自。往。前。敵。爲。自。由。之。攻。擊。且。二。軍。能。連。奪。要。隘。破。敵。人。受。上。賞。我。一。三。兩。軍。何。獨。不。與。諸。兵。士。約。曰。攻。擊。命。令。早。應。頒。發。惟。敵。軍。雄。悍。埋。伏。重。重。戰。敗。固。受。傷。戰。勝。亦。必。受。傷。大。帥。對。於。兵。士。愛。如。赤。子。傷。亡。過。多。於。心。不。忍。故。屢。次。來。電。誠。諭。不。

准輕易下攻擊命令。今君等既如此忠勇大帥聞之當必十分快慰。但須與諸君約。此次進攻只許勝不許敗。只准前進不准後退。以步兵兩軍一取山海關。一取九門口。後列機關槍隊。再後爲砲隊。以相掩護。君等欲於死中求活。只宜奮勇前進。猶可博得一生設退後。卽將死於機關槍下。戰機迫斷難稍容。云云諸兵士皆大呼贊成而命令乃下。此下令以前之情形也。至攻擊山海關方面之主力軍。卽爲奉軍中最負盛名之二六兩旅。旅長以下軍官皆身先士卒。奮勇前進。與直軍激戰二小時之久。直軍漸退。奉軍猛攻逼近。直軍之戰壕。此時奉軍步槍全已停發。純用肉薄。前軍競以手流彈向戰壕內投擲。後方機關槍射擊尤烈。落彈如雨。相持一小時之久。奉軍一部已攻入戰壕。觸犯地雷。轟然爆發。此部軍隊幾乎全沒。附近軍隊將欲退却。督隊官數名各發手槍十餘響。擊斃二十餘人。兵不敢再退。復行返攻。此時奉軍死傷最多。後方增加數次。肉薄又一小時之久。遂將戰壕取奪。進攻長城。城上直軍密布。重重以上擊。

下最爲得利。奉軍前仆後繼，絕無餒氣。不及半小時，薄近城根，擔架上登，極其勇猛。直軍由城上用槍擊，並擲炸彈。奉軍死於城下者已堆積如山。此時由奉軍中駛出飛機三十餘架，向城上及城內亂擲炸彈。直軍漸形擾亂。奉軍見城堅難下，乃以重砲轟城牆，將城擊頽一角。直軍由城上紛紛墜下，而奉軍砲彈射擊益急。磚石崩裂，石屑四飛，甚於砲彈。直軍目迷不能敵抗，乃大亂。奉軍由城牆頽處鑽擁直上，更以手流彈亂相投。擲直軍不得下城，多由城上墜至城下，碎頭折股，積於城下。直軍見長城已失，乃亟向灤州退却。奉軍乘勢佔領山海關，距關南北數十里。城牆以下屍積如山。城牆以東者爲奉軍被直軍擊斃。城牆以西者爲直軍多墜城而死。二六兩旅每旅各八千人，戰後查點，每旅祇剩六七百人，死傷可謂衆矣。

至九門口，方面戰事雖極激烈，而奪取實甚僥倖。蓋攻取九門口視山海關尤難，該口寬度僅六七尺，尚不及一丈。實有一夫當關，萬夫莫入之勢，而口之兩

偏山勢又極險峻不能攀登非從口入無由前進而在口附近數里地雷電網及種種埋伏障礙物等布置極爲嚴密雖出絕大之犧牲亦不易攻克及兩軍接仗激戰數小時直軍退却奉軍追擊觸犯地雷死傷甚衆而後方督促甚嚴不容退却奮勇進戰復數小時之久迄無開展適直軍方面某某兩團不知緣何遽爾誤會自起衝突該管軍長竭力約束竟爾無效乃發槍威嚇秩序大亂守口軍隊不知內部生變以爲奉軍繞道攻入口內由後方兜擊軍心動搖遽形凌亂奉軍覩此情形猛加攻擊直軍紛紛潰散奉軍遂乘勢佔領九門口所獲重砲山砲機關槍及輜重極多然奉軍死傷已及四五千人軍官傷亡亦復不少

按山海關與九門口皆爲重要隘口奉軍死傷雖衆而獲戰勝之功不可謂非大幸也

十七 馮玉榮戰死九門

九門之役。直軍第一軍左翼指揮十三混成旅旅長馮玉榮死之。馮旅素以勇悍著稱。當兩軍奮戰之時。猛烈異常。砲彈如雨。毫無怯色。及後方爲奉軍包圍。馮氏見勢不利。使副官潛赴總司令部告急。自率步兵一營向奉軍猛然突進。於是背腹受敵。玉榮最初身受一彈。絕不退却。令四圍從卒輪流背負指揮。初次腹部受一彈。更次頭部受一彈。始不能支。急連往秦皇島後方陣地。乃氣絕。副官啣馮氏之命奔回總司令部。據實報告。王維城知長城戰線難以支持。決意命左翼山海關之線右翼石門寨之線之全軍暫行退却。急命昌黎附近。之二十六師十五師之第一混成旅及張家口之第四混成旅其他所有部隊。一律前進。一面命第十二混成旅開赴石門寨死守陣地。是役損失最大。皆爲第十三混成旅也。

先是九日上午。奉軍第六旅一團已被直軍包圍。彭壽莘電京告捷。謂奉軍全團降伏。正在繳械中。請晉馮玉榮上將銜。以資鼓勵。及下午二時。奉軍第二師。

第二混成旅全部出動形勢陡變直軍之砲陣先燬奉軍肉薄先登機關槍彈如霰雨十三旅全部反被包圍降軍自內譁變奪槍枝衝陣而出於是九門要隘遂不可守矣

十八 吳佩孚親赴前線督戰

吳佩孚自率第三師由洛陽開拔北上暫駐京畿調度後方軍務及聞山海關之敗乃於十一日上午四時偕將校二百名兵士五百名分乘列車開赴前線至天津相近忽發現炸彈二枚於軌道枕木上幸有一俄人報告未遭轟擊閱二日而抵山海關時尙未破曉卽率全體參謀巡視九門石門陣線於七時三十分歸進早餐復出指揮戰事親至前線後方督戰乘馬持刀來往馳驅隨行護衛者有少年軍三百餘人均持槍佩劍後方設機關槍多架如兵士有攻戰不力意圖後退者卽擊殺之官長一律高中級軍官如經吳梭巡親見督戰不力者卽自拔佩刀斬之奉軍三旅扼守九門直軍進攻者約兩旅兵力戰事澈

夜不止。惟在吳佩孚歸司令部前。奉軍漸呈紛亂之象。取守勢作戰。吳語人曰。余料一二日內可逐敵軍出關。

奉方飛機知吳佩孚抵山海關後異常活動。十三日六時半奉飛機投下炸彈。落於後方列車之旁。炸毀兵舍數間。該飛機盤旋約十五分鐘始去。十四日午前七時奉飛機一架翱翔於山海關空際。探察陣勢。八時許又有二架駛來。向車站拋擲炸彈數枚。直方以砲擊之。彈子飛落異常逼迫俄而飛機暫低其炸彈一枚落於吳佩孚列車旁。後以高射砲擊過。猛旋卽飛回。收隊。吳氏在陣地猶自若。並不稍爲介意也。

十九 沙河寨石門寨之戰

山海關方面之戰事可分兩路。一爲海岸。一爲山地。海岸之戰雖亦猛烈。然猶不若山地之甚。蓋就形勢而論。由山海關至九門口長城。依山向西北展爲一微曲線。曲線內凹處爲三道。關關之東北爲角山。角山爲山海關地勢最高處。

出海千六百尺。登山瞭望東可望見錦州西可及灤州。直軍之耳目卽在此處。其附近之要隘爲二郎廟。再北展卽爲九門口。九門口與山海關在一平行線。上爲角山所阻不能南向。故奉軍入九門口後逕向西方進攻。逾田家崗沙河寨而至石門寨。其行軍之勢與關內之京奉路作一平行線。至石門寨始轉而南向。石門寨之前爲長興店。有大森林。直軍禦敵卽在此處。由此往東爲五泉山。正對沙河寨。再東爲角山。正對九門口。故直軍由五泉山而攻沙河寨可斷。奉軍半部之歸路直軍由角山逾二郎廟而攻九門。則長城以內之奉軍可以囊括而盡。是於十餘日來兩軍極力以爭沙河寨二郎廟等處。其原因卽在此也。

初奉軍已得九門。進攻王岡子。王岡子去九門三十里無險可阨。奉軍排牆而進。十五師之一部萬難抵禦。十日上午二十三師加入戰鬥。然亦無濟於事。下午五時全部退守沙河寨。而王岡子亦陷。

沙河寨之戰。在十二日。沙河之東爲奉軍陣地。西爲直軍陣地。吳佩孚親臨前敵。第三師之一部擔任左翼。不幸左翼砲隊受奉軍重砲轟擊。第三師砲兵一營陷於全滅。砲陣既失。步隊向後退却。故沙河寨亦爲奉軍所奪。於是戰爭焦點漸迫石門寨而中間之二郎廟高地遂爲二軍勝負之所繫焉。

十五日拂曉。吳佩孚因直軍左翼受壓。迫急派第三師前往援助。猛圖奪回沙河寨。鑾戰多時。不支而退。直軍受創甚重。惟直軍正面之力攻乃係一種策略。一面派兵由左翼暗地包抄。不意爲奉飛機偵知。立時報告。卽由韓麟春副軍長率兵一隊攜帶濠溝曰砲及機關槍。經山中小路前往要擊。直軍未及布陣。遽受痛擊。紛紛潰退。正面直軍敗退後。固守石門寨。奉軍奮勇進攻。直軍死命相抗。但卒敗退。遺棄重砲兩尊。按直軍除二十三師及二十五師各有重砲一尊外。其餘僅第三師有重砲。此次之敗實與吳佩孚以重創也。

二十 奉軍攻克二道關

十七日。下午。奉軍第三軍副軍長郭松齡。攻入三道關。三道關在山海關之北。有關三重。卽爲長城之三大甕圈。因山勢以立城頭關。最下二關較高三關。尤高。然頭關較之。關外已爲高地。由三關俯擊易。由頭關仰攻難。古時築城故意。選擇此種地形。以爲關者。而直軍之布置亦如銅牆鐵壁。堅固難破。第三軍軍長張學良。對此十分重視。頗擬暫取守勢。徐圖良策。曾將此意電達張作霖。而郭松齡則不謂然。以爲兵家固重。避實擊虛。但在今日。亦不能墨守成規。我軍逼城數日。連戰有功。正宜利用機會。出奇制勝。况山海關附近。已爲我軍佔領。兵力既已通連。策應均極順便。而直方軍隊。守關雖衆。援應未至。正宜激厲士氣。一鼓進攻。若待援軍大至。兵力深厚。更不易撼動。學良諱其議。乃令郭氏率領本部軍隊。約一萬三千餘人。於十七日拂曉。向三道關進攻。而直軍於頭道關布滿地雷。後安設電網。後方又以山砲機關槍護之。及奉軍臨近關口。直軍由上俯擊。勢至順利。彈丸如雨。紛紛墜落。奉軍死傷頗多。而由下仰攻。又

極不得手。祇恃一鼓勇氣奮往直前。半小時後攻抵關下。地雷電網歷歷在目。郭軍長乃令兵士各自潛伏。另用馬匹數百頭驅之使前觸犯地雷轟然爆發。山崩地塌沙土滿空。數百頭馬匹所存無幾。地雷既破。郭乃率領潛伏兵士進逼電網。令兵士以水流彈向電網上投擲。兵多彈烈。電網亦即炸毀。此時關上直軍俯擊最烈。奉軍紛紛倒地。不得已令後方砲兵掩護。用步兵仰攻頭關。直軍不支。退入二道關。以上擊下。愈形猛烈。奉軍乘勢攻進頭道關。遂入於因山立城之一大甕圈。中山險甕固別無屏障。可以藏身除冒彈雨猛烈進攻外。惟有退出頭關可避艱險。此外別無支路。可入二道關。郭軍長令以迫擊砲鎮壓直軍機關槍掩護兵士衝入二道關。雙方猛烈衝擊。又約二小時。直軍始退回三道關。奉軍入二道關後更感困難。蓋二關之內爲一絕長之山澗。深數百尺。道炸毀。徒餘深澗。使奉軍不能飛渡。過澗以西。山勢突高。仰攻尤難。直軍在三平時二三兩關之間。於澗上修有棧道。彼此通行。此次直軍退時。用炸彈將棧

道關上以上臨下攻二道關中之奉軍歷歷在目發無不中奉軍由下上攻除
迫擊砲射程較高尙可發生效力外其餘步槍機關槍皆無所施其技郭軍長
以棧道既斷奉軍固不能飛渡而直軍亦難驟下乃令步兵在二道關牆下暫
伏以避彈雨一面令迫擊砲向上猛擊一面令工兵造臨時棧道二六旅工兵
在直軍彈丸如雨之下百丈深澗之上極力擔架不及二小時棧道修成潛伏
步兵立時攻進山麓此時直軍槍彈已不能發生效力乃皆以手榴彈向下猛
投因山勢之起伏不平炸彈亦未盡有效因之奉軍奮勇猛進未及半小時已
抵三道關下直軍見奉軍進攻猛烈萬難支持乃棄關而退保持距關二華里
之高地以待援軍郭軍長以三關既陷立率所部向前進擊直軍紛紛向臨榆
方面退所遺槍砲輜重至多此時天已薄暮郭軍先鋒敢死隊乃在角山寺紮
營以待後路大隊角山寺在臨榆之北距臨榆僅五里舉兵進攻已無險要阻
塞按九門口及三道關七門之西皆居高山峻嶺道路崎嶇直軍憑險抵抗勢

極堅固斷非一路軍隊兵力所能攻入乃由一三兩軍協力進攻韓麟春副軍長親督軍隊由九門口晝夜前進奉軍由下仰攻直軍自上俯擊地利相去懸絕進攻之難非可言喻由此日以繼夜猛進不懈日得一山夜渡一嶺歷無數困苦艱難鏖戰四晝夜之久始奪得二十餘里之山地由隘路衝出此時吳佩孚已派陝軍第二師及吳部第三師之一旅急遽前來救援不謂援軍到時直軍已由石咀子退却由九門至石咀子二十餘里山險路狹馬不能並轡車不能方軌設使直軍援隊早到三四日則奉軍亦難獲勝奉軍既據險要布成陣勢直方援軍阨守沙河寨奉軍乘勝猛攻直軍又由沙河寨退守石門寨由吳佩孚指示機宜反守爲攻勢極猛烈雙方激戰經一晝夜之久奉軍遂又佔領石門寨會姜登選軍長派礮團由無名口方面間道出石門寨之東南猛烈襲擊時直軍師長張治功正在司令部與其參謀等談戰事奉軍突然攻入張之司令部中親信人員有炸死於室中者張氏亦受傷是役奉軍獲重砲二門機

關槍八支。山野砲各二門。三八式野砲十二門。陸路砲八門。子彈糧秣無算。至是奉方一、三兩軍勢力已聯絡一氣。十八日乃令第十六旅進攻秦皇島。

一一十一 角山寺一郎廟之戰

九門口與石門寨兩地相去六十里。實爲直軍左方陣地。有陝西第二師暨二十三師、二十六師駐守。直軍失此陣地。則斷絕山海關秦皇島之後路。蓋奉軍此次作戰。決計在斷絕昌黎要道。故注全力於此。雙方爭奪得而復失者數次。兩軍砲兵均包圍該寨。屢用大砲轟擊敵方。結果以奉軍砲力優勝之。故卒於十五日將石門寨佔領。於是吳佩孚不得不傾其全部精銳。以謀奪角山寺二郎廟之高地也。

角山寺二郎廟之戰。爭開始於十七日晚。兩軍死力混戰。至十八日曉。益形激烈。直軍自夜至晨。步兵砲兵機關槍等不絕向北方增援。奉軍則由海岸方面向車站市街極力砲擊。以妨害之。兩軍旋進旋退。奮鬥甚烈。結果奉軍除佔領角山寺二郎廟之高地也。

二郎廟外且攻陷痘嶺進五泉寺山南側而奪取其西北面至傍晚更前進而佔毛家溝。

奉軍已下二郎廟角山寺之直軍亦被擊退至山麓十九日拂曉吳佩孚下總攻擊令直軍分三路前進第十二師及陝軍一部任中路第二十三師及豫軍一部任右翼第二十四師及鄂軍一部任左翼同時取包圍陣勢向奉軍猛攻楊清臣另率一部協助第三師爲援軍總計前後部隊有五師八旅之衆奉方用騎兵爲前隊迭向直軍陣地衝擊直軍用近射砲夾輔步兵以抵抗之自晨至午均在鏖戰之中吳佩孚明言曰若一旦戰敗寧死不退親赴海陽鎮北方長興店深林內督戰有日本守備隊參謀細木乘馬同行雙方砲火極烈直至午後六時始止蓋二郎廟之克復爲吳氏之所必要也。

自奉軍克二郎廟角山寺後在關內之戰線益形開展一三聯軍均已開入關內士氣既盛形勢上亦佔優勢戰事前途頗抱樂觀第三軍長張學良曾親自

回奉向張作霖報告一切意氣甚盛。遄返戰線後，即與姜登選、韓麟春、郭松齡等計劃進攻策略，結果仍分一三軍爲二路。一路攻取灤州，一路攻取秦皇島。因自三道關攻克後，魏家溝、楊家鎮、角山一帶均被奉軍次第佔領，周圍已無若何險要。兵分兩路同時進攻，可成兼程並進之功。故自十九日起，一三聯軍頗有調動，除派一旅兵力固守角山寺外，又派兩大部隊向西南出發，布成犄角形勢，以包擊直軍。果再將直軍擊敗，則奉軍在關內之戰線愈形完成。不惟灤州易下，喜峯可克，即秦皇島亦易取。奪實爲一最緊要之關鍵也。直方與奉對峙之軍隊，覩此情形，均抱一絕大之隱憂。各司令聯名向吳佩孚請示機宜。吳驥聞奉軍之布置，亦爲駭然，當即秘密馳赴前線觀察形勢，見奉軍形勢果極周妥，苟不迅速突破，前途益難進展。破之之法，惟在使奉軍新布置之戰線，不得完成而奉軍以連戰皆捷之氣勢，又非少數兵力所能攻破。乃令第十三師、第十四師、第十五師全部之兵力於二十日拂曉向角山迤西附近之奉

軍加以猛烈之攻擊該地。奉軍不過兩混成旅開抵此地，未越三時。所有軍隊一半休息，一半埋鍋造飯，未幾奉軍即得探報，謂直軍大隊由西南方面進攻，頗為迅速。請亟預備迎敵。時奉軍整理隊伍，尙未成而直軍砲彈已紛紛向奉軍附近處墜落。奉軍冒彈向前迎敵，兩軍激戰約二小時之久，不分勝負。直軍之機關槍砲等之擊射較往次戰爭尤為猛烈，且因軍隊衆多，聲勢尤壯，而奉方軍隊不過兩旅，以衆寡比較，實已不敵。然猶勉強支持一小時之久，幸左翼援軍忽至，猛攻直軍之右側，激戰又歷一小時之久，仍不分勝負。奉軍見直軍戰線短促，中心軍隊彙集于此，乃以重砲猛向直方中軍射擊，倉猝間不及散開，死傷綦衆。內部軍隊遂亦因之動搖，而正面交戰之直軍以爲後路被奉軍所抄襲。一時頗現進退維谷之勢，向前之攻擊力遂因以銳減。奉軍乘此時機竭力猛攻，又用迫擊砲奮力壓迫直軍，漸難支持，隨擊隨退。此時吳佩孚已親到戰線，欲親自督隊進攻，見前方軍隊又忽敗退，異常憤怒，立出手槍擊斃。

軍官一員吳所帶衛隊約二百餘名亦大聲疾呼速向前進勿退退即槍斃軍隊至是不敢再退遂又向前猛進此時正面奉軍又有一部援軍開到加入戰線勢力亦盛兩軍竭力攻擊又歷三四小時仍未分勝負而奉軍砲隊射擊頗準砲彈紛紛向直軍中墜落直軍死傷至多此時紅日西墜天色昏黑兩軍仍奮鬥不已直至晚九時許張學良姜登選郭松齡等各軍長均已前來督戰在角山隱處憑高眺望兩軍戰鬥形勢未幾卽下令命正面軍隊退至角山西南山角停止以守爲攻不准移動又令砲隊隱於角山之左機關槍隊隱於角山之右向直中軍猛加射擊此時有探照燈兩架由角山上發光向直軍中射照直軍仰攻情形歷歷在目砲隊及機關槍隊憑角山之高地依探照燈所射之光線盡力射擊直軍死傷不知凡幾而前仆後繼終未退却直至二十二晨六時兩軍尙奮鬥不休而直方後路軍隊已現調動形勢奉軍右翼又有援軍增加兵力加厚左翼直軍漸不能支遂向後方退却奉軍見敵敗退奮力進擊約

愈一小時左翼直軍後退已遠右翼追擊之奉軍適臨正面直軍之左側乃立時分兵爲二一面向南追擊直軍之左翼一面向東猛攻正面直軍之左側正面直軍兩方受敵死傷過鉅遂亦向後退却奉軍見直軍已敗追擊益猛不期追擊直軍左翼之右翼奉軍竟觸直軍日晚間所伏之地雷線轟然爆發震憾山岳奉軍死傷至三四百人之多一時砂石彌空藥烟若霧奉軍目迷神眩不知所措頓呈亂象直軍乘勢竭力反攻奉軍驚魂難定不能支持遂向後方退却直軍仍猛力追擊不已在角山正面之奉軍突出其右奮力截擊又激戰數小時之久直軍不支向後方退却此時右翼奉軍已在五泉寺交界河間莊一帶停止隊伍布成逆襲陣勢是役直軍死傷約三千人左右奉軍亦死傷八九百人按奉直歷次劇戰奉軍每較直軍死傷爲多獨此次則否蓋因奉軍憑角山之險而又純取守勢直軍仰攻復羣存犧牲之心故傷亡較奉軍多數倍也。

至沙河寨石門寨方面十九日下午四時直軍約一萬五千餘人之兵力突然向沙河寨附近地方抄襲奉方守兵竭力抵抗直軍勢重進攻頗猛奉軍防線幾被衝破乃亟通知石門寨奉軍火速應援該軍接信後立派一旅軍隊繞向直軍左翼猛事包擊騎兵進攻尤猛直軍左翼無大備遽形凌亂紛紛向後退却幸後方軍隊強固向前奮死敵抗不至被奉軍完全攻破兩軍衝突約二小時之後方步兵趕到加入戰線與直軍激鬥騎兵退後作相機之衝擊蓋此部援軍以騎兵爲多因沙門寨求援之信甚亟沙門寨距石門寨約二三十里步兵行遲難濟緩急乃先派騎兵一團急馳赴援步兵亦同時出發及騎兵接仗二小時步兵趕到接替騎兵與直軍互鬥直軍兵力頗爲牽制沙門寨之攻擊遂以漸緩而奉軍據守之沙門寨亦遂轉危爲安但直軍之攻擊力仍甚猛烈激戰至一夜之久兩軍死傷無數奉軍不退直軍仍竭力向前猛攻至二十日晨五時奉軍左翼漸漸向後退却直軍右翼以爲奉軍力竭進攻不捨追擊

不及二里。遂中奉軍之地。雷轟然爆發。死傷綦衆。殘餘者紛紛向四方潰散。奉軍左翼乘勢反攻擊斃。直軍不少。又執傷兵問之。知係靳雲鶚之第十四師。據云此部進攻軍隊爲斬之十四師與張福來之第二十四師共三旅。兵力皆爲生力軍。奉吳佩孚命令謀突。攻沙河寨。衝破奉軍關內戰線。以固直軍之側面。者直軍右翼誤觸本軍舊埋地雷。受創甚鉅。復被奉軍左翼之包擊。遂不能支。持向後退却。左翼方面亦被石門寨派來之第二批軍隊包擊。不能展布而攻取沙門寨之正面軍隊。以兩翼均已受創。士氣漸餒。遂於二十日午刻舍棄攻勢。向後退却。據軍界中人云。是役直軍死傷約在三千人以上。營團長傷者亦不少。十四師有營長二員死於地雷。二十四師有一團長身受重傷。奉軍營長一名。腿部受傷。排長陣亡二名。司務長一名。軍士死傷二百五十餘名。吳佩孚自二十日以來。力謀角山寺。二郎廟兩高地之克。復約增加一師團之。二十二日晨七時。奉軍第十旅佔領安門寨。此處距京榆鐵路約五千米。達。

兵力自臨陣前督戰猛攻然至二十一日晨未能奪取乃用曹銀之名揭示懸賞若奪取角山寺與二郎廟各賞十萬元沙河寨與石門寨賞二十萬元

以角山石門寨之兩點雙方爭奪至於十餘日此兩地之重要固可想而知蓋奉軍以熱河境內山地崎嶇軍事運輸極不便利進且孤軍深入反冒危險故一變其原來之戰略於朝陽主守於榆關主攻反之直軍之目的本欲以海陸軍相連之勢一鼓而下綏中聚軍艦於葫蘆島則朝陽奉軍顧慮後路當不戰而退今奉既爲先發制人之策愈引起直軍之奮鬪遂以後方所有之實力悉加援於此此山海關戰事之所由劇烈也

當吳佩孚未出京以前羣以吳氏一至山海關必能大破奉軍及吳氏旣至直軍亦僅能固守陣地使奉軍不再進步蓋直軍昔以十三旅守九門口一戰而爲奉軍所奪遂致山海關形勢完全動搖此實爲最初失敗之點其後陝軍第二師長張治功在石門寨督戰失守陣地又給直軍以重大之打擊此一師一

旅之失敗。吳氏雖欲挽救。陣勢驅逐。奉軍於關外。實力已有所不能。迨馮胡返旆。停戰令下。而山海關之直軍。益岌岌乎其危矣。

一一一 馮胡班師入京請求下令停戰與免吳佩孚各職

馮玉祥對此次國內戰事。早蓄和平之主張。抵承德後。與陝軍司令胡景翼。熱河都統米振標等協商一致。馮軍在熱河前線者。於十三日已與奉軍完全妥協。奉軍備攻熱河之第四軍。因此停止進攻。改道由平泉南下。直取灤州。十八日。吳佩孚得知此種警耗。急電曹錕。請准退守灤州。曹氏恐搖動軍心。不准。所請。而馮胡諸人。遂於十九日率領所部全軍。星夜兼程回京。二十三晨。一時馳抵北苑。卽召集會議。一面派員邀請京畿警備副司令兼陸軍第十五混成旅旅長孫岳。前往面談。敦勸一致行動。並告以前方軍隊委實不堪再戰。爲救國。救民。計除停戰議。和外無他辦法。結果孫岳表示同情。並聲明願協同維持治安。惟要求對於曹銀不爲已甚。議定後。卽由馮胡孫米及所屬全體師旅長聯

銜發出通電云國家建軍原爲禦侮自相殘殺中外同羞不幸吾國自民九以還無名之師屢起抗爭愈烈元氣愈傷執政者苟稍有天良宜如何促進和平與民休息枯萬民之骨究之因何而戰爲誰而戰主其事者恐亦無從作答本年水旱各災饑荒遍地正救死之不暇竟耀武於域中吾民何辜罹此荼毒天災人禍並作一時玉祥等午夜傍徨欲哭無淚受良心之驅使爲休戰之主張爰於十月廿三日決意回兵並聯合所屬各軍另組中華民國國民軍誓將爲國爲民效用如有弄兵而禍吾國好戰而殃吾民者本軍爲縮短戰期起見亦不恤執戈以相週旋現在全軍已悉數抵京首都之區各友邦使節所在地方秩序最關重要自當負責維持至一切政治善後問題應請全國賢達急起直追會商補救之方共開更新之局所謂多難興邦或卽由是臨電翹企佇候教言陸軍檢閱使第十一大師師長馮玉祥陝西陸軍第一大師師長胡景翼大名鎮守使陸軍第十五混成旅旅長孫岳熱河都統米振標旅長岳峻田玉潔鄧寶

山陳紀才陳雲龍馮震東曹世英張之江李鳴鐘宋哲元剡郁芬鹿鍾麟孫良臣蔣鴻遇孫連仲等同叩印
馮軍入城保護九門貼示安民其佈告云爲佈告事照得兵凶戰危古人所戒國家至不得已而用兵必求有益於國有益於民斷未有不顧國家之安危不恤人民之塗炭一意孤行好戰喜鬪如今日者豈不知民爲邦本本固邦寧乃徒快個人之私窮兵黩武迄無已時當民國九年我國五省災旱最烈之時正畿輔戰役極劇之候京師震驚國門喋血使國家受重鉅之損失元氣大傷至今未復自是憑戰勝之餘威挾元首以自重攬國柄於掌握視疆吏如僕從而對於國家人民絲毫無補夫洪憲之役復辟之逆謂其顛覆共和背叛國家也而數年以來力征經營者果何爲哉戰役迭經影響至鉅百業因之凋殘全國受其糜爛礙阻商務來友邦之噴言助長內爭啓共管之藉口迭次爭戰之結果當爲國人所共見本年天災流行哀鴻遍野人民救死不贍何堪再罹兵劫

稍有人心。何忍出此。而野心勃勃。方興未艾。興無名之師。爲孤注之擲。傾全國之兵。無一餉之備。飛芻挽粟。責諸將死之災。黎陷陣衝。迫我絕糧之飢。卒民不聊生。兵無鬪志。損國威而長內亂。皆好戰喜鬪階之厲也。本使爲國除暴。不避艱危。業經電請。大總統明令懲儆。以謝國人。停戰言和。用蘇民困。起國內之賢豪。商軍國之大計。和平解決。指日可待。惟念京畿爲首善之區。使館林立。商務雲集。用特下令班師。仍駐原防。不特對於地方之秩序。力予維持。而外人之生命財產。更當特別保護。倘有無知之徒。妄加揣測。生事造謠。希圖煽惑。定當嚴密查訪。重懲不貸。爲此剴切佈告。仰商民各色人等。務要各安生業。萬勿自行驚擾。切切此佈。

當二十二日上午。公府方面已得馮軍班師之電訊。然消息間接。得來猶在將信將疑。中及至下午。胡景翼在遵化遷安之軍隊。忽有一部分退回通州府中。幕僚得此消息。遂會議於公府調查。其真相所在。然猶未知有此劇變也。其實

此時馮玉祥胡景翼王承斌業已行抵高麗營九時左右馮軍二十二旅已由汽車全部運抵北苑十一時旅長鹿鍾麟卽率所部至安定門先以技術隊一連攜帶手槍爬城而入突至安定門迫遊緝隊開城一時餘佔據車站電報電話各交通機關至二十三日早二時餘則內城各城門及東西四牌路交通要道均有馮軍遍佈而中海南海之圍牆亦團團圍住景山上有大砲四緊對中海新華門前更有重兵駐守公府遂在包圍中曹鋐聞訊驚惶失措遍找幕僚皆已散值而電話又不通無從得新華門外之狀態甚爲焦急直至清晨七時孫岳由北苑歸方知係馮軍班師而李彥青於此業已被捕矣馮軍到京之第一日曹鋐尙不明外間之形勢如何仍執猶豫態度故除馮氏拍發通電外並無若何表示至第二日上午九時四十分顏惠慶親往北苑訪馮玉祥徵求意見並請馮指示吳佩孚免職後之間題如前敵軍隊如何處置及其他善後問題如何解決等等以便依照發令施行顏馮面談之結果馮玉

祥卽命薛篤弼到府謁曹請求下令停戰並免吳佩孚各職顏惠慶亦入府與曹詳陳一切謂熟計利害只有依允煥章之要求下停戰令與免吳子玉職曹曰對奉作戰雖係子玉主張予實成之要辦子玉先辦曹某言辭之間態度頗形强硬繼而孫岳至謂公身安全某等可以擔保請勿顧慮停戰令爲和平而發不妨早下至於吳子玉個人業商之煥章已允通融給予一名義下臺曹銀無法乃謂顏惠慶曰責任內閣一切可負責辦去予聽君等辦理可也顏出府乃召各閣員在私宅會議遂決定下停戰令而以青海墾務督辦與吳佩孚下午六時許由顏持命令稿入府請曹蓋印曹閱稿長嘆曰我負子玉遂蓋印而命令遂於下午七時發表原文錄下

比歲國家多難兵禍相尋本大總統受任之初卽以振導祥和爲職志耿耿此心久經宣示於衆此次用兵東北實出萬不獲已而蘄望和平之志未嘗一日或渝軍興經月戰鬪未消軫念痛癟至深惻怛茲特申令停戰自下令

之日起兩方軍事着卽停止進行各守原防聽候中央籌議結束辦法其有抗令不遵者仍當强行制止以期促進和平與民休息此令
討逆軍總副司令等職應卽撤消所有山海關一帶軍隊着責成督理直隸軍務王承斌幫辦直隸軍務彭壽莘安爲維持遵照前令辦理此令
直魯豫巡閱使兼陸軍第三師師長吳佩孚着免去本兼各職此令
特派吳佩孚督辦青海墾務事宜此令

中華民國十三年十月二十四日

一一二 奉軍進佔秦皇島昌黎灤州等處

自馮玉祥入京直方前線軍隊大受影響各旅均無鬪志然在二十四日上午直方軍隊尙未知北京方面情形吳佩孚依然在後督隊盡力向奉軍猛攻至奉方軍隊於二十三日夜二時許卽得馮王回京之消息因張作霖接到京津加急確電後立時轉電各路軍長各軍長接閱後卽向所部宣傳謂馮王已率

兵返京。京津現已全被馮王軍隊佔據。胡景翼率軍東來截斷吳佩孚後路。吳軍已陷窮困之境。我軍正宜乘勢猛攻。一鼓可破。蓋各軍長藉此以激勵士氣。也故二十四日之戰。吳佩孚存破釜沈舟之心。進攻既較往日尤烈。而奉軍以成功在於旦夕。接戰時精神亦極奮發。兩方激戰半日。不分勝負。而直軍死傷實倍於奉軍。至下午一時。直軍亦得北京生變消息。後路軍隊懼爲馮玉祥截斷。前線軍隊戰鬪力銳減。每一分時間僅放一砲。此爲兩軍歷次戰鬪以來所未有。奉方知直軍將退。乃預備進擊。收拾殘兵。至晚六時。許奉軍戰線遽行開展。將龍王廟方面之直軍第二十三師包圍。奉軍勢重。直軍猛力攻突。數次不能脫。此時奉軍飛機多架。均已出發。迴翔直軍之上。空散布許多傳單。謂馮玉祥王承斌等助奉反。曹率兵佔據京津。直方大勢已去。勿爲無謂之犧牲。繳械投降者厚賞。助賊爲逆者不赦。等語。該軍知內部生變。已確大勢已去。而奉軍又圍之重重。不能突出。遂有一部分繳械。計得帳篷四百座。大車三百輛。皆載。

滿行李糧食等物槍砲彈八百餘箱大槍五千餘支砲三十六門奉軍仍前進追繳其他各部軍隊之槍械同時張宗昌副軍長率所部向冷口方面進擊直軍直方在冷口附近之軍隊爲第十三師及第九師之聯合軍約四千餘名激戰數小時直軍亦被奉軍包圍又激戰一小時直軍死傷愈多不得已而繳械計得步槍四千餘支山野砲十六門機關槍二十六架其他輜重車輛子彈尤多自此兩部軍隊繳械後直軍形勢益形不利山海關及沿海岸之直軍皆在奉軍砲線壓迫之下退却各軍均紛紛投奔秦皇島二十七日奉軍下總攻擊令卽於當晚用大隊圍攻秦皇島與彭壽莘軍激戰至二十八日下午彭軍始退昌黎及安山一帶抵抗嗣因後方胡景翼軍將逼近唐山恐爲胡軍截斷歸路卽紛乘京奉車退回唐山在唐山附近佈防並將灤州附近之軌道拆去一段奉軍張宗昌吳光新部隊由昌黎沿路向灤州進發

二十八日下午四時張宗昌部隊出現於灤州北面高地在灤州直軍之一部對張宗昌軍防戰即被擊破直軍全部或乘火車或徒步散竄四方五時張軍

完全占領灤州

山海關方面之直軍從二十九日起着手預備退却但三十日晨在二郎廟安民寨方面因奉軍猛烈攻擊致戰線被突破直軍被壓迫至山海關西關是日午後奉軍第三軍之一部佔領秦皇島中國街截斷直軍之後路午後三時其砲兵布置砲陣於日本營之東砲擊退却之直軍同時副軍長郭松齡從安民寨衝破直軍戰壕由角山寺海陽鎮轉戰而至秦皇島直軍齊集於棧橋附近該軍爲第三第九第十四第十五第二十六各師屬於陝西河南之各軍並不排成隊伍亦無人指揮又因飢寒疲勞將卒多呈失神狀態其得上運送船者除負傷兵外約不過二千人不獲上船者仍回至中國街三十一日在該島附近解除武裝者約逾二萬人此外復於山海關俘六萬撫寧俘五千

人。內。有。上。級。軍。官。甚。多。自。直。軍。諸。要。塞。相。繼。爲。奉。軍。佔。領。後。灤。州。以。東。之。直。軍。非。遁。卽。降。已。無。一。人。奉。軍。於。三。日。內。共。獲。來。復。槍。三。萬。八。千。枝。重。砲。九。十。尊。以。上。

十一。月。三。日。上。午。七。時。奉。軍。張。宗。昌。部。猛。力。進。攻。蘆。臺。直。軍。張。福。來。部。不。支。紛。紛。潰。退。至。十。時。退。至。北。塘。及。塘。沽。一。帶。奉。軍。遂。佔。蘆。臺。

四。日。吳。光。新。之。騎。兵。隊。與。第。二。軍。之。一。部。由。蘆。臺。追。擊。直。軍。是。晚。佔。據。塘。沽。

一十四 吳佩孚敗走塘沽曹錕退位

馮。玉。祥。胡。景。翼。孫。岳。等。聯。名。通。電。後。卽。組。織。國。民。軍。馮。任。總。司。令。胡。孫。任。副。司。令。邀。請。段。祺。瑞。爲。國。民。軍。大。元。帥。胡。軍。出。防。唐。山。以。遏。吳。軍。歸。路。孫。軍。進。攻。保。定。以。斷。直。方。後。援。而。馮。軍。則。駐。紮。繁。豐。臺。以。備。天。津。並。擬。邀。集。元。老。會。議。以。解。決。時。局。時。吳。佩。孚。在。山。海。關。接。馮。氏。等。通。電。深。滋。疑。惑。覆。電。詢。馮。云。主。張。停。戰。不。勝。駭。詫。列。名。諸。將。均。在。外。何。以。電。在。京。拍。恐。係。有。人。捏。造。請。明。白。宣。示。馮。答。電。

云。民。九。以。還。戰。事。迭。興。民。生。日。蹙。國。計。日。艱。不。忍。再。戰。故。聯。電。主。張。停。戰。一。時。權。宜。事。前。未。會。電。商。殊。深。抱。歉。倘。蒙。贊。同。國。家。之。福。人。民。之。幸。敬。候。教。言。云。云。吳。知。大。事。已。去。而。停。戰。免。職。諸。令。繼。下。吳。乃。以。前。線。諸。事。委。諸。彭。壽。莘。張。福。來。糧。城。之。間。一。方。電。蘇。鄂。諸。省。乞。師。赴。援。云。先。滅。馮。逆。再。討。奉。張。雙。方。兵。隊。並。爲。作。戰。之。計。劃。而。山。東。山。西。同。時。並。宣。告。中。立。鄭。士。琦。派。兵。駐。德。州。閻。錫。山。派。兵。守。石。家。莊。以。絕。吳。氏。之。援。軍。張。紹。曾。調。停。於。吳。馮。之。間。未。得。要。領。長。江。諸。督。結。七。省。聯。防。以。存。觀。望。之。心。七。省。者。江。皖。贛。湘。鄂。閩。浙。也。吳。氏。之。勢。既。孤。進。退。維。谷。而。天。津。各。國。領。事。及。駐。軍。司。令。又。根。據。辛。丑。條。約。不。准。吳。佩。孚。在。離。津。周。圍。二。十。里。內。駐。兵。吳。益。頽。喪。十一。月。二。日。清。晨。馮。玉。祥。胡。景。翼。各。軍。開。始。攻。擊。楊。村。奉。軍。亦。由。唐。山。進。攻。吳。軍。腹。背。受。敵。至。正。午。遂。棄。楊。村。陣。地。紛。向。天。津。潰。逃。魯。軍。旅。長。潘。鴻。鈞。被。俘。三。日。上。午。國。民。軍。進。佔。北。倉。吳。

佩孚率三千餘人乘列車離津南行由塘沽乘恆利艦他去吳軍擬東路退德州西路退鄭州

吳軍既敗退二日曹銀亦宣布退職印璽交國務院秘書長袁良保管公府文件等由國務院各科科長分別接收至是而江浙奉直戰爭遂告一總結束嗚呼武力統一已成畫餅總統賄選如此下場曹吳既倒中國之政治將來是否入於光明之途雖未可逆料但此次內爭之結果據使團確查直軍在山海關及熱河共死傷八千餘人逃散者五千餘人奉軍在山海關九門死傷七千餘人逃散及俘虜四千餘人江浙共死傷六千餘人南北軍用品及軍費損失在七千萬以上人民之損害尚不在內估計本年內戰直接間接損失足以償還所負外債而有餘兵凶戰危可嘅也夫

上 海 大 東 書 局 代 售

■時事小說■
近十年之怪現狀

全四册 定價一元六角

民國三百件希奇案

全四册 定價一元二角

伍廷芳軼事

全一册 定價大洋三角

李純軼事

全一册 定價大洋一角

奉直戰史

全二册 定價大洋五角

▲ 上海宏文圖書館出版 ▼

中華民國十三年十一月出版
中華民國十四年一月三版

奉直戰史(全二冊)

(定價大洋三角)
(外埠酌加郵費雜費)

編輯者 上海宏文圖書館

發行者 上海宏文圖書館

印刷者 上海宏文圖書館

發行所 上海宏文圖書館

▲此書有著作權不准翻印▼

新 戲 攸

= 上海宏文圖書館出版 =

□ 狸貓換太子

一册

二角

□ 王華買父

一册

二角

□ 紅菱豔

一册

二角

□ 呆徒富貴

一册

二角

= 上海大東書局代發行 =